















HARENGVE

Faict au nom de

L'VNIVERSITE DE PARIS,

deuât le Roy Charles sixiesme, & tout le conseil, contenant les remonstrances touchant le gouuernement du Roy, & du Royaume:

Avec les protestations du Treschrestien Roy de France, Charles VII. sur la determination du Concile de Basle.

\*

A PARIS,

On les vend en la grand' salle du Palais, en la boutique de Gilles Corrozet.

1 5 6 1.

Avec priuilege du Roy.

THE NEWBERRY  
LIBRARY

Case

F

39

326

15619

EXTRAICT DV  
priuilege.



*L*est permis par lettres patentes du Roy, à Vincent Sertenas libraire à Paris, d'imprimer ou faire imprimer vn liure intitulé *Harengue faicte au nom de l'Vniuersité de Paris, deuant le Roy Charles sixiesme, &c.* Et deffenses faictes à tous autres, d'imprimer ou faire imprimer ledict liure, iusques à six ans, apres ensuyuans, cōme plus à plain est contenu es lettres de priuilege.

Donné à Paris, le vingtcinquesme iour de Ianuier, l'an mil cinq cens soixante.

Signé par le Conseil.

DE COURLAY.

**HARENGVE PAR MA-**  
*niere de remonstrance faicte au Roy Charles*  
*sixiesme, par maistre Iehan Gerson Chance-*  
*lier de l'Eglise de Paris, proposant pour &*  
*au nom de l'Vniuersité de Paris, touchant le*  
*grād bien du Roy, & du Royaume, present*  
*monsieur le Daulphin, plusieurs Ducs,*  
*Comtes & seigneurs du sang, &*  
*autres gens de tous*  
*estats.*



**V**IVAT REX, VIVAT REX, VIVAT REX,

*Tertij regum primo:* Viue le Roy, vi-  
 ue le Roy, viue le Roy: viue, vi-  
 ue corporelement, spirituelement,  
 & ciuilement: viue spirituelement  
 perdurablement, & raisonnable-

ment. Cy offre & propose ceste belle salutation,  
 la fille du Roy, la mere des estudes, le beau cler  
 soleil de France, voire de toute Chrestienté, l'V-  
 niuersité de Paris, de par laquelle nous sommes i-  
 cy-enuoyez, en la presence treshonorable de  
 vous trefnables excellens Rois, princes, & vous  
 tous Messeigneurs du hault & tressage conseil, ou  
 est representee la dignité, magnificence & maiesté  
 Royale: Sommes enuoyez, dis ie, pour parler de  
 la vie du Roy, de son bié, & de tout son Royaume.

A ij



## Harengue au Roy

Nó point par auctorité, maistrise, ou presumption (soit hors telle outrecuidance) mais par toute humilité & deuote exhortation, comme fille tresobeissante au pere & du pere: & côme subiecte loyale de son souuerain & droicturier seigneur. Pour rant commence elle par priere & supplication ou impetration, en vsant de la parole du peuple d'Israel à Salomon, quand Dauid luy commanda qu'il fust assis en son trosne, & regnast, combien qu'il fust moult iouuencel & tendre, *Sicut notatur primi Paralipomenon, 2.* & fut ce fait à la supplication de sa mere Bersabee. Lors tout le peuple au commandement du Roy Dauid, & en signe d'approbation de liesse & exultation s'escria, *Vivat Rex: Viue le Roy.* Nous lisons en Daniel le prophete, au deuxiesme chapitre, que les sages de Babylône la grād, qui faisoient lors l'Vniuersité de celle cité & contrée, quand furent venus deuant leur Roy Nabuchodonozor, pour exposer son songe, leur premiere parole fut semblable à la nostre, *Rex, inquit, in sempiternum viue: O Roy, dirent ils, viz perdurablement, viue le Roy.* C'est belle entree & sage salutation: quelle merueille est donc, si la fille du Roy ensuit ceste sagesse & l'exemple de ceste Vniuersité? car entre sciences acquises & naturelles qui en celle la seulement se monstroient, l'Vniuersité de Paris, premiere & principale des estudes inspiree au premier homme des le commencement du monde en paradis terrestre, descēdue par succession aux Ebrieux, par Abraham en Ægypte, comme dit Iosephus, puis d'Ægypte en Athenes, puis d'Athenes

## Charles sixiesme.

3

à Rome, puis de Rome à Paris: ceste Vniuersité, dis ie, a trop plus noble cōgnoissance de vraye foy & de la vie pdurable: pourquoy est dictē Lumiere de la foy, maistresse de verité, & le beau cler luminaire de toute saīcte Eglise & Chrestieté: si doit & sçait mieulx dire, *Rex in eternum Viue*: Dieu doit bonne vie au Roy. *Viuat Rex*: Viue le Roy. Mais au si considere & sçait bien la fille du Roy que son bien, son auancement, son hōneur, sa garde, sa protection depend du Roy, comme de son vray pere, par benigne, ciuile & dignatiue adoption. *In salute illius est salus sua*. Quelle merueille dōcq' si elle desire & prie pour sa bonne vie: & dict, *Viuat Rex*? Au surpl<sup>s</sup>, la fille du Roy, plus noble tiltre ne luy sçay ie bailler, tourne & enuoye souuent par tout le Royaume de France les yeulx de sa consideration qui sont plus clers que le soleil & plus multipliez que ceulx d'Argus: parquoy elle est biē comparee aux animaux que vit Ezechiel pleins d'yeulx dehors & dedans. *Ezechielis primo*. Las que voit elle en sa consideration? Elle voit turbation par tout, meschef par tout, tourment douloureux par tout. Elle voit en plusieurs lieux oppression cruelle de peuple, pour iustice, violence: pour misericorde, rapine: pour protection, destruction: pour soustenance, subuersion: pour pasteurs, pilleurs: pour defendeurs, persecuteurs, violation de pucelles, prostitution de mariees, boutemens de feux en aucuns saincts lieux, profanatiōs de sainctes places, meurtremens de plusieurs: voire, qui pis est & horrible merueille, elle voit l'hōme soy mesme se def-

## Harengue au Roy

faire par raige & desespoir pour les grans maulx qu'il ne peult endurer: & à brief dire elle voit hon teuse & miserable dissipation de ce Royaume, que Dieu ne vueille, si remede n'y est mis, & cōuenable prouision. Car selon ce qui est escript au second li ure des Machabees, *Primo capitulo*, par le iugement de Omas souuerain prestre de la loy, *Sine regali prouidentia impossibile est rebus pacem dari*: Sans la Royale prouidence ou pourueance est impossible de dōner paix aux choses. La fille du Roy, la tresbien vueillante de ce Royaume trespuissant & treschre stiē, s'escrie à haulte voix par pleurs & par sours, *Viuat Rex, viuat Rex*. Pourquoi? car elle sçait bien ce que dit le sage, *Prouerbiorum secundo*, *Rex qui sedet in solio iudicij intuitu suo dissipat omne malum*: Le Roy qui est assis au trosne de iustice dissipe par son regard tout mal & toute malice. Et qui est sō regard? C'est son conseil: Duquel dit ailleurs le sage, *Ibi salus ubi multa consilia*. Là est salut ou sont plusieurs cōseillants. Dieu vueille doncques que par ce regard soyent dissipez tous maulx comme il sçait que mestier en est: & comme nous rous en auons esperance quand nous les regardōs qu'a ceste fin sont icy assemblez: & à present tant benignement nous escontent: mais en oultre, la fille du Roy, la mere des sciēces cōgnoit & sçait par la doctrine des Theologiēs, Iuristes, Philosophes, & Poetes, en especial par la determination expresse d'Aristote en ses Politiques, que Royaume ou regne est police & gouuernement meilleur & plus durable, conuenable & raisonnable qui soit, à l'exemple du monde qui



n'est gouuerné que par vn Dieu souuerain. Le mō-  
de, dit Aristote, *Duodecimo methaphorica*, ne se veule  
point mal gouuerner : & pluralité des princes ou  
principaulx est mauuaise : *Vnus ergo princeps*. Donc-  
ques n'est qu'un prince, ainsi Homere, ainsi Pla-  
ton, ainsi autres l'ont mis, tant feussent idolâtres  
par dehors pour plaire au peuple. Ainsi le petit  
mōde, c'est à dire l'homme n'a qu'une ame raison-  
nable qui tout gouuerne. Nous auons au premier  
des Machabees, *secundo capitulo*, que apres la mort  
d'Alexandre, qui seul seigneurioit, furent creées  
& diuisees plusieurs seigneuries : mais que dit le  
texte, *Et multiplicata sunt mala in terra*. Les maux aus-  
si furent multipliez en terre. *Nulla fides regni sociis* Lucain.  
*omnisque potestas impatiens consortis erit*. N'a foy ne loy  
en ceulx qui quierent ensemble regner ou domi-  
ner. Cy congnoissés vous tresnobles & excellens  
seigneurs cōme à grand droict & à bonne cause la  
fille du Roy de Frâce desirât le bon gouuernemēt  
de toute la chose publicq̃ souhaite & quiert viure  
vn Roy, vn prince & vn seigneur souuerain : pour  
tāt dit elle, *Vivat Rex*. Viue le Roy. A la parfin quāt  
à ce qui est celuy qui ne iuge bien, & cōgnoisse le  
detestable maudict & execrable scisme qui dissipe  
des si lōg tēps & gaste la sainte Eglise? Iamais  
ne se peult plus conuenablement bouter hors, que  
par le treschrestien Roy de France, en ensuiuant  
l'exemple de ses predecesseurs. Autāt doncq̃ com-  
me chacū bon Chrestien doit desirer, querir & ai-  
mer la paix de sainte Eglise, voire de toute Chre-  
stienté : autāt doit dire, prier & supplier, *Vivat Rex*.

## Harengue au Roy

Viue le Roy. La Bible nous recite, *Nehemia secūdo*, Quād Nehemie maistre de la loy voulut impetrer du Roy de Babylonne, la deliberation ou redemption du peuple d'Israel captif, & que le temple de Hierusalem fust redifié, il commença par dire, *Rex in eternum uiue*: Sire Roy, Dieu te doint vie perdurable. Si doit bien à cest exēple la fille du Roy, maistresse de la loy qui tend à la bonne franchise & liberté du peuple de France, & à la restauration, non point du temple materiel, mais spirituel & mysticque de toute la sainte Eglise, dire & commencer, *Viuat Rex*. Qui ainsi ne le quiere & desire ou qui voudroit la Royale seigneurie estre muee en autre police, ou estre cassée ou destruite, ou mauuaiselement diminuee, ie montre & prononce que tel ne se mōstre pas estre loyal fils de sainte Eglise, ne bon subiect du Roy. Et qui pis est, il resiste à la diuine ordonnance. *Omnis potestas à Deo est: & qui potestati resistit, Dei ordinationi resistit, Rom. decimotert.* Si toute puissance est de Dieu, comme dist saint Paul, doncq' qui resiste à la puissance, il resiste à la diuine ordonnance. Cecy a plus special lieu en la puissance Royale du Roy de France que ailleurs, pource que sa puissance est plus specialement approuuee & honnoree de Dieu que les autres: & comment? par ce que quand Saint Remy baptiza Clouis le premier Roy Chrestien, il loingnit de la sainte ampoule enuoyee par miracle: & le consacra en signe de Royale puissance, & comme sacerdotale ou pōtificale dignité: celuy seroit doncq' repugnant au miracle de Dieu, & cōme scismaticque

## Charles sixiesme.

5

& sedicieux, qui ne se consentiroit à ceste priere, & à ce beau cry que faiçt tousiours la tresloyale & tresdeuote fille du Roy, *Viuat Rex: Viue le Roy.* Vray est aussi que la matiere presente qui se doit proposer & traicter, & au plaisir de Dieu bien terminer, a en soy telle difficulté, hautesse & arduité, qu'elle ne se pourra bien demener, ne mettre à conuenable fin sans la speciale grace du saint Esprit, & de celuy qui dit, *Sine me nihil potestis facere, Iohan. decimoquinto.* En la main duquel sont tous les Royaumes du monde. Sy est bien raison de commencer tousiours par oraison, cōme la fille du Roy la faiçt des le commencement en processions & messes: & encore perseuere en suppliant, *Viuat Rex:* car le cueur du Roy, dist le sage, *Prouerbior. Vigesimo primo,* est en la main de Dieu, sa vie, sa santé, son Royaume, & sa prosperité. Et moy qui sens mon insuffisance en science, eloquence & en toute autre chose pour si haulte & digne matiere proposer, & son droit viuement & proprement exposer, attendu vostre tresredoutable presence, en laquelle est telle dignité, excellence & prudence que chacun sçait: que doy ie faire, ou doy ie recourir sinō principale mē à l'aide de Dieu? Et pource que à ce ie ne suffiz pas encores, & si est la matiere publique touchant à tous; Nous esleurōs, si vous plaist, de commun accord & sentiment deuor noz cueurs à Dieu, & mettrons nostre esperāce, desir & confiance en son aide, & en ce noble conseil commencerons ce deuor hymne qui est mistique à dire, lequel on chante quand les saints conseils de l'Eglise se font, à fin



## Harengue au Roy

que Dieu, selon sa promesse, soit cy ou plusieurs, non pas deux ou trois seulement sont assemblez en son nom, & dirons pour bien commécer, moyenner & finer, *Veni creator spiritus, mentes tuorum visita, imple superna gratia quæ tu creasti pectora*: Venez benoist Sainct Esprit nostre createur, descendez & visitez les cueurs que vous auez creez, & de vostre grace les remplissez. Accomplissez, vous suppliôs, les bons desirs de nous tous, par vostre inspiration sainte & secrette. Et qui est ce desir, Dieu vous le sçauetz. *Viuat Rex*: Viue le Roy. Et vous tresnoble & excellent Prince, & tous messeigneurs plaise vous entendre patiemment & benignement ce qui est à dire: ne prenant point tant de garde à l'humilité ou exiguité de ma pauvre personne indigne, indigne est elle, ne à la rudesse ou indiscretion du langage comme au faict en soy, qui est tât iuste & raisonnable: car tout ne tend en conclusion fors, *Viuat Rex*: Viue le Roy, viue, viue. En ceste confiâce de la grace de Dieu & de vostre beniuolence: & pource que la matiere de laquelle ie doy parler, doibt auoir toute faueur, & la fille du Roy, pour la quelle ie parle doibt estre escoutee sans ennuy, & sans malle suspicion d'iniure à quelque personne petite ou grande, Dieu m'en deffende. Je suis trop obligé à tous: & mal se querroit paix par iniure. Je procederay oultre en mon faict: mais parauant ie feray regratiation deuote ioincte à l'hüble supplication, la regratiation est à Dieu le souuerain Roy à nostre Dame, à saint Denis patron de France, à toute la court de paradis: & à vous trefexcellêt sei-

gneur. Quand nous tous voz humbles subiects vous voyons, certes à grand lieffe & ioye de cueur estre assemblez presentement d'un commun accord, affermé & confirmé par serment & par lettres, pour entendre à la bonne ordonnance & disposition du Roy & de son Royaume: c'est doncques bien commencé pour accomplir ce que la fille du Roy supplie, *Viuat Rex*: Viue le Roy. En bone foy ce estoit bien necessaire que tel accord se fist: car autrement commét eust on peu proceder conuenablement au faict du Roy, & du Royaume. *Libro quarto capitulo secundo*, recite Valere, que plusieurs Romains ayās inimitiez & haines mortelles, eulx assemblez incontinent venoient à accord, quand ils se veoient esleuz à aucuns offices de la chose publique ensemble, comme furent Marcus Æmilius & Fuluius Flaccus: itē Sextus Iunius & Nero contre Hasdrubal. Car si les gouuerneurs de la ciuilité sont diuisez, ils tendront à nuire l'un à l'autre: & l'un destruira ce que l'autre fera pl<sup>9</sup> que autremēt. Mais aussi le bon accord & vnion de vous cōfond vos malvueillans en donnant ioye aux bons amis: car cōme dit le sage, Celuy qui est aidé de son frere ou de son amy est fort comme vne tour tresferme: *Frater qui adiunatur à fratre quasi ciuitas firma. Et Virtus vnita fortior est seipsa dispersa*. Afferme Iulius Cesar au liure de *Bello Gallico*, que la France d'un bon accord & consentement pourroit à tout le monde resister. Et comment sera ce cōsentement? ce sera par l'accord des printipaulx seigneurs: mais fil y a contētion tout se diuifera. *Effusa est contentio*

## Harengue au Roy

*inter principes & errare fecit eos in inuio & non in via.* A ce vault l'histoire recitee p Macrobe du Roy d'Athenes, qui pour ceste consideration reuint à accord avec son filz qui grandement l'auoit offensé. Nous voyôs que à mal faire gens se assemblent & vnissent: Herode & Pilate pour persecuter Iesus Christ: larrôs à piller & à rober: les ennemis d'enfer à nous greuer. Trop plus se doibuent vnir les seigneurs à bien faire: car leur discention est trop nuisable & rechet toute sur leur pauvre peuple dit Horace, *Quicquid delirant reges plectuntur Achini:* Quelque folie que les seigneurs font, le peuple l'a chepte. Grace à Dieu dôcq' qui vous a donné ceste bonne volonté. O combien c'est vn grâd bien! O quelle iocūdité vous regarder en ceste vnité, plus tost qu'en discord! Dieu y doint bōne perseuerance: c'est la supplication ioincte à nostre regradiation que vous perseuererez de mieux en mieux: autrement ce ne vauldroit gueres: ains diroit on par auenture, c'estoit vne paix fourree ou faincte: c'estoit dissimulatiō pour plus se nuire ou pl' greuer le peuple: si doibt estre tout oublié du tēps passé.

*Post inimicitias nusquam meminisse malorū,* ce dit Cathon. Tulle dit en la louenge de Iules Cesar, qu'il n'oubloit riens fors ses iniures. Et ce l'aida à conquerre victoire: & vient de noble courage. Peult estre messeigneurs que parauant plusieurs choses ont esté dictes ou faictes d'un costé & d'autre, par vns & par autres qui tendroient à la depresseion de l'un & esfaussement de l'autre, pource que chacun vouloit seruir ou complaire à son maistre &



partie. Mais ce ne doit poit nuire, ains deuez dire ce que dict Octouien à Herode qui auoit esté pour Anthoine contre luy, & qu'il confessoit qu'il auoit voulu destruire Octouien pour bien seruir son maistre, *Non inuidemus virtutibus*, respondit Octouien, nous ne hayons point les vertus, si tu as esté loyal à mon aduersaire quād tu le seruois, ainsi le feras tu à moy quant tu seras de mon party : & luy pardonna tout. Le considere oultre que dissension peult biē auoir esté sans haine ou maleuolence comme entre sainct Paul & Barnabas : & ce viēt quand on sçait au certain la volonté de Dieu en ce qui est à faire : comme nous auons en Daniel des deux bons anges selon sainct Gregoire. Mais or prenons que haines & iniures ayent esté faictes : ne vault il pas mieulx qu'elles soient effacees & oubliées pour le bien du Roy & de tout son Royaume, qu'elles se poursuiuent pour tout destruire du hault en bas ? Nous auons que les Grecs faisoient aucunes fois pour le bien commun mieulx valōir vn commun accord, qui se nōmoit Amnestia, que nous pouons appeller Abolition, ou tout est pardōné sans iamais riens demāder. Nous auons aussi de plusieurs nobles Romains qui aimerēt mieulx souffrir la mort, voire pour soimesme, que barail-ler ou greuer leur pais, tant fussent bannis iniuste-ment par leurs gens : il apparut par Themistocles, qui pour ceste cause en sacrifiant beut du sang de taureau. Soit doncq' tout donné au bien du Roy, & du Royaume. Et n'est point à peu peser le serment qu'on dit auoir esté faict en ceste matiere.

## Harengue au Roy

Serment est tresfort lien, puis qu'il est licite. Et pour tel bien n'est homme qui en puiſt dispenser. N'auons nous pas de Regulus tant fut payen qui aima mieulx à retourner à ſes ennemis cruels ceulx de Carthage, que fauſſer ſa promeſſe & foy de gẽtilhomme. Les parolles de Roy ſe doibuent tenir. Le Roy Iehan pour ceſte cauſe retourna en Angle terre, Iepte n'eſpargna pas ſa propre fille. Et n'eſt point de merueilles ſi vous Meſſeigneurs auez iurẽ à entendre concordamment au bien du Roy, & du Royaume, quãd le Roy en ſon institution le iure. Iſſez hors doncq' flateurs: hors d'un coſtẽ & d'autre, qui par leurs fainctes parolles feroiẽt bien combattre pierres ou preſques les Anges de Paradis ſi on les vouloit ouir ou croire. Toute leur eſtude eſt ſemer diuiſiõs par rapporter mauilx, à fin qu'ils ſemblent eſtre les bons varlets, ou bons amis. Et pour complaire ils ſcauent trop bien que voluntiers on oit mal dire de ce que on hait. Soyent oyees parolles de paix, à fin, que paix perſeuere comme nous le ſupplions: expulſẽ & chaſſẽ ſoit vilainement qui par ſa coulpe premier fera le diſcord. En ceſte confiance & bonne eſperance ie reuiendray ou i'eſtoie: & diray pour declairer quelle choſe on demande en beau cry, *Vivat Rex*: Viue le Roy.

### *Diuiſion du Theme.*

**I**E trouue au liure tant de nature comme d'eſcripture trois manieres de vie, la vie corporelle charnelle & perſonnelle: la vie ciuile politi-



que ou vniuersele: vie de grace diuine ou spirituelle. La premiere est defaillable: la seconde permanente: la tierce perdurable. La premiere vie corporelle se maintient en la coniunction de l'ame & du corps, *de qua Genesis secundo, Factus est homo, & cetera. Et propheta, Quis est homo qui viuet, &c.* La vie ciuile se maintient en coniunction & vnit  du seigneur & du peuple en vne loy ou iuste ordonnance: *de hac Philoso. in Politicis ponit, Quod in legibus est vita ciuitatis: & Apostolus comparat corpus mysticum ad verum, eadem ratione, ad Roman. duodecimo: & prima ad Corinthios decimotertio: & ad Ephesos quarto.* La tierce vie spirituelle se maintient par coniunction de Dieu & de l'ame en charit  & en vnit  d'amour, *de qua ad Galatas secundo, Vivo ergo, iam non ego: viuit vero in me Christus.* Chacune de ces trois vies & toutes ensemble ont depri    nostre Roy en disant, *Viuet Rex:* Viue le Roy: viue, viue, viue ciuilement: viue corporelement: viue spirituelement. On pourroit icy parler   ce propos de trois belles fleurs de Lis d'or resplandissant au champ d'Asur du Royal escu. On pourroit admener la fiction poetique du Roy Herilus *Æneid. 8.* duquel dit Virgile qu'il auoit trois ames & trois vies,

*Nascenti cui tres animas Feronia mater,  
Horrendum dictu, dederat, terna arma mouenda  
Ter leto sternendus erat:*

Lai ons ces choses & disons que la premiere vie est defaillable: *Hodie Rex, cras moritur, Eccl. duodecim.* Auiourd'huy vit vn Roy, & dema  meurt. La deuxiesme vie est permanente: car elle se deriue par suc

## Harengue au Roy

cession legitime de la Royale lignee, & est plus à  
aimer que la premiere, d'autât que le bien cōmun  
vault mieulx que le propre. En signe de ce le bon  
Prince expose sa vie corporele pour la defense de  
ceste vie ciuile: exemples y sont sans nombre. La  
vie tierce est diuine & perdurable, qui trop miculx  
vault que nulles des deux premieres: car comme  
dit Iesuschrist, Qui n'est en la grace de Dieu, il n'a  
riens qui prouffite. *Quid prodest homini si vniuersum  
mundum lucretur, anima verò sua detrimentum faciat,*  
*Matthæi decimo septimo, Mar. & Luc. nono.* mais tour-  
nez sil vous plaist vn peu les yeulx de vostre confi-  
deratiō enuers la fille du Roy, & les ostez de moy.  
Aduisez bien son estat & sa composition & vous  
voirez que tresconuenablement luy appartient de  
faict & de parolle ce noble cry, *Vivat Rex.* Pour-  
quoy regardez la faculté de Medecine, elle cure &  
gouverne la vie corporele. Regardez Philoso-  
phie morale, ethiques, æcomoniqs & politiques  
dequoy traittent les ars: & voyez decret, & loix,  
vous trouuerez que par ces deux facultez est gou-  
vernee la vie ciuile & politique. Theologie, cela  
est certain, gouuerne la vie spirituele, diuine & ca-  
tholique. Ne soit doncq' aucun qui empesche ou  
deffende la fille du Roy, que elle ne die en publi-  
que par tout, *Vivat Rex.* C'est celle qui a proprieté  
de tendre tousiours à paix. Car elle est figuree par  
Pallas maistresse des sciences qui donna nom à A-  
thenes par le commun iugement: quand Mars ou  
Neptunus le vouloit imposer, fut dict, que qui  
produiroit chose plus proffitable, il donneroit nō  
à Athe-

à Athenes. Pallas fist germer vn oliuier en signe de  
paix : Mars vn cheual en signe de guerre & mort.  
Paix fut iugee meilleure. Si peult dire l'Vniuersité  
ce qui est escript au huitiesme des Cantiques, *Fa-  
cta sum coram eo tanquam pacem reperiens*: Le suis faicte  
deuant Dieu & le Roy, comme celle qui trouue  
paix. Et ne soyent oys mėsongers au contraire qui  
voudroient dire qu'elle eust esté partiale en ce-  
ste matiere. Car oncques ne bailla deputes à sei-  
gneur quelconque qu'elle ne soit & ait esté & se-  
ra preste d'en bailler tellement à chacun autre qui  
voudra tendre à la bonne vie du Roy & à iustice.  
L'office de la fille du Roy est traicter & enseigner  
verité & iustice. Elle se ioinct & adhere à chacun  
qui tient pour iustice & verité. Et à ceste intention  
& non autre, ie vueil viure & mourir auec elle &  
ses loiaux supposts aussi. Et s'aucun dit, Dequoy  
se veut elle entremettre ou mesler? Voise estudier  
ou regarder ses liures: c'est trop petitement adui-  
sé, que vouldroit sciēce sans operation? *Scientia abs-  
condita & thesaurus immersus, quae utilitas in vtrisque?*  
On n'apprēt pas seulemēt pour sçauoir: mais pour  
mōstrer & ouurer, *Ethicorū secundo*, si vn prescheur  
maistre ou bachelier peult & doit publier la do-  
ctrine qu'il a apprinse pour instruire les autres, la  
fille du Roy pleine de tant de maistres clorra elle  
sa bouche, cachera elle sa lumiere deffous le bāc  
& sa science en terre? Cecy n'est point à dire. Le  
trosne de Salomon qui signifioit Royale puissan-  
ce se soustenoit par deux bras à dextre & à senestre.  
C'est le beau mirouer, leq̃l on dist que fist Virgile



## Harengue au Roy

pour garder Rome , pource qu'il monstroït tout. C'est le bras de Cheualerie & Clergé. Si dôcq' vn cheualier pour soustenir iustice se trouue exposé soy & sa vie en bataille, le bras de Clergé & l'Vniuersité de Paris laissera il tout tresbucher sans mot sonner? Trop en seroit à reprendre. Pésons doncq' comme la fille du Roy est dictée comme le bel œil cler mis en ce Royaume pour veoir tout ce qui y est à faire. Et est cōme la guette mise au plus hault de la tour : pour regarder que mal ne vienne : Ou cōme l'imaige de Pallas mise en Iliō, la plus principale tour de Troye la grand'. Laq̃lle imaige durār, eut duree Troye. L'vniuersité qui est telle clorra elle ses yeulx, se taira elle, se laissera elle obscurir, ou embler? Ou seroit la loyauté de la fille subiecte au pere? Ou seroit la doubte de la peine que menace Dieu par Ezechiel aux prescheurs qui se taisent cōtre les vices? *Ecclesiastici Vice simotertio*. Plutarque seul homme osa bien escrire à L'empereur Traian la maniere de son gouuernemēt, en adioustant de moult grand franchise & liberté. Si tu (disoit il à l'Empereur) veulx te bien gouuerner, tu as introduiseur en plutarque, & si tu veulx faire autremēt, ce liure sera tesmoing que tu ne vas point à destruire l'Empire, *eodē Authore Plutarco*: C'est à dire par le fait ou l'autorité de Plutarque. Pourquoy doncq' ne peult & doit dire telles paroles plus franchement la maistresse de verité à son Roy & seigneur? Quediroit tout le bō peuple de Frâce, leq̃l l'Vniuersité enhorté tousiours p ses supposts à patrie & bōne obeissance au Roy & aux seigneurs,

ſelle ne parloit auſſi bien que le Roy ſe porte benigne-  
ment, iuſtement & raiſonnablement enuers  
ſon peuple? Ce ſembleroit fait de trop grád' flate-  
rie ou diſſimulation : & que iamais le peuple ne  
nous vouliſt ouir. Mais pour cõcluſiõ, l'Vniuerſi-  
té ne repreſente elle pas tout le Royaume de Fran-  
ce, voire tout le monde, en tant que de toutes pars  
viennent ou peuuẽt venir ſuppoſtz pour acquerir  
doctrine & ſapience? Or eſt cõme vnẽ ſcience ver-  
tueuſe, deriuee de tout le corps de la choſe public-  
que au ventre de l'Vniuerſité pour naiſtre gens de  
route perfection. Si doit l'Vniuerſité cõme pour  
France, comme pour tous les eſtats, deſquels elle  
a aucuns eſtudians, comme pour tous leurs amis e-  
ſtans en grieve affliction qui ne peuuẽt venir cy,  
ou eſtre en leur douloureux lamentatiõ: doit dy  
ie prier & dire, *Viuat Rex, Viuat Rex.* Et à ce vous  
monſtrez bien voſtre accord, treſnobles princes,  
quand telle audience & ſ'y planiere vous luy bail-  
lez, dont nous vous mercions : en ſuppliant qu'il  
vous plaiſe en oultre ouir la principale matiere de  
la vie triple du Roy.

*La premiere diſtinction.*

**V**ue le Roy, premier de la vie corporele: la-  
quelle ſe garde & maintient par la propor-  
tiõ & harmonie cõuenable des quatre pre-  
mieres qualitez, chault, froid, moiteur, &  
ſeicheſſe. En la diſproportion ou indiſpoſition  
de ſes contraires qualitez au corps humain ſe cor-  
rompt la complectiõ vitale & naturele, par auoir  
trop chault, ou trop froid, ſelon ce que experience

## Harengue au Roy

en maladies diuerſes le monſtre. Sy prendrons icy le premier article de noſtre ſupplication, qui eſt du bon regime de la Royale perſonne du Roy: & dirons quatre conſiderations.

### *Premiere conſideration.*

**E**N tant que on aime la bonne ſanté du Roy, & de ſa vie corporele, on ne doit point blaſmer ou rendre haineuſe la fille du Roy. Au Roy en eſpecial quant à la faculté de Medecine: en diſant que Medecins ne ſont point prouffitables ou autrement: Car Medecine apres Dieu eſt ſon aide: & celle qui plus peult prouffiter à garder ceſte vie, ſi ne doit point eſtre reboutee, cōme miſerable ou neant prouffitant.

### *La deuxieſme conſideration.*

**L**Es bons amis & loiaulx ſubieſts doibuēt queſſir la ſanté & vie corporele du Roy, comme ils voudroyent & deuroient vouloir pour eulx meſmes la querir, en oſtant tous empeschemens de fait qui le griefuent ou nuſent à auoir ſa ſanté. Non pour tant que par heures ce ne luy pleuſt point, car ainſi le deuroit chacun vouloir eſtre fait en ſoy. Et de fait requerir ſoimeſme, que on le retint contre ſon gré, ſi par ignorance ou autrement il ſe vouloit trebucher ou bleſſer, encores plus ſi de la vie d'un tel, deſpendoit le bien de tout vn Royaume. Et faire ainſi à vn Prince, ce

ne seroit point resister, ou contrarier à sa seigneurie & puissance: & mettre la main *In Christum domini*. mais seroit obeir & proufiter comme s'il auoit vn membre nuisant par maladie à tout son corps, on le trencheroit par feu ou par cousteau. Et à ce doibuent soy vnir & accorder tous les plus prochains de son sang: sans ce que l'vn voise auant & l'autre arriere pour mal complaire.

*La troisieme consideration.*

**C**ombien que la vie du Roy corporele soit à querir diligemmēt: pourtāt ned oit estre adioustee, ny ne doibuent estre creuz, receuz ou conseillez les anathematizez & maulditz de Dieu & de sainte Eglise, Sorciers, Magiciens, Charmeurs & telles folles gens & peruerfes. Car ainsi faire, seroit non pas seullemēt neant prouffiter, mais de certain empescher la bōne vie & santé du Roy: selon ce que apres au tiers point de la vie spirituele sera demonstéré clairement.

*La quatrieme consideration.*

**A**Ce seroit chose bien conuenable & necessaire pour la bonne vie corporele du Roy, en aidant la ciuile & spirituele que mieulx vaillant quē le Roy fut tousiours bien accōpaigné, au moins de preudes gens d'estat & de bōnes meurs deuotz à Dieu & tresloyaulx au bié public: Car tousiours bonne parolle bon lieu tient:



## Harengue au Roy

& encores plus bõ exemple. Item ne doit point aussi estre tellement opprimé trauaillé ou pressé comme on l'a veu souuent en grãd preiudice, voire de tout le Royaume pour les demãdes irraisonnables & treschargeans des charges que on luy fait. Dieu vueille que par garder ces considerations ou semblables nostre priere soit accõplie, *Viuat Rex*: Viue le Roy. Et soit icy noté en ce que i'ay dit & diray de la vie du Roy, q̃ le pareil soit entendu & gardé en la trefnoble personne de monseigneur le Daulphin son premier filz & vray heritier: Car il est comme vne mesme personne avecques le Roy, selon le dit du sage, *Ecclesiast. trigesimo, Mortuus est pater, quasi non est mortuus: reliquit enim similem filium post se*. Le pere apres sa mort naturelle ou ciuile vit en la personne de son filz. De ce vient que le pere & la mere desirerent tant que leurs enfans succedent à leur heritage & seigneurie, entant que la mere de Clouis espouse du Roy des Bourguignõs (aĩsi se nõmoit pour lors) le duc aima mieulx eslire que ses trois filz fussent occis, que ilz fussent tondus & deuestus & forclos de leur heritaige. Aĩsi le firent leurs oncles de deux, le tiers, Sainct Cloud fut preserué: deslors regnoit ambition mere de male trayson, cruelle, sans foy, sans loy & sans lignage à noblesse. Nous auons exemple la diligence que Bersabee fist enuers Dauid à fin que son filz Salomõ regnast: aĩsi de plusieurs autres. Et s'aucun dit que monseigneur le Daulphin n'est que vn enfant, qui en doit tenir cõpte? Respõds, que quelque ieunesse qu'il ait, il est vray



hoir, & vit le Roy en sa personne. Aussi tât le Roy aume est vny & ioinct à luy par aliance, comme naturelemēt, en tant que coustume vault nature: Coustume dis ie que le Royaume vny par succession legitime. Et icy se fonde la principale raison des Philosophes à prouuer que le Royaume soit mieulx gouuerné par succession que par election. Pource que on obeist plus voluntiers à celuy que on a accoustumé que à vn estrange ou nouuel. Or est il ainsi que en obeissance gist tout le biē de domination. Au surplus quelque ieunesse que ait mōseigneur le Daulphin, on le doibt bien garder & endoctriner, comme la mere Sainct Lois fist de luy: dequoy vindrent tant de biens. Non pourtāt fust il ieune esleué au Royaume, car il estoit sage en la sagesse de ses conseilliers, puissant en ses cheualiers, & iuste en ses bons officiers. On ne pourroit assez dire comme prouffite bonne doctrine à ieunes enfans : & comme leur nuist la mauuaise. Ioias n'auoit que huiēt ans quand commēça à regner, *quarti regum, vicesimo secundo*, il fut le plus vail lār & sage des autres, & prouffitabile apres Dauid pour la bonne instruction qu'il eut des sages de la loy & d'autres. Et les Hebreux, & Iosephus disent que Salomon en son commencement n'auoit que vnze ans: & sainct Hierome le semble tenir en recitant pour confirmation que de son temps vn enfant à neuf ans engendra vn filz. Ionathas n'estoit point vieux quand il regna pour son pere Azarias par vingtcing ans, luy viuāt corporelemēt, mais mort ciuilement par estre mesel. Et à brief

## Harengue au Roy

dire Dieu veult & peult souuent enuoier prosperité à vn Royaume plus par innocence petite que par plus grans pecheurs, veu que iceux enfans ont garde d'Anges, non point seulemēt pour leur per sonne, mais pour toute leur seigneurie, *Secundum ordinem Hierarchiarū*. A tant nous nous passerōs de ceste matiere. Dieu vueille que le Roy & sa noble seigneurie soient tellement gardez, gouuernez & instruits que nostre desir soit accōply : & de tous loyaux François, qui font ce cry, *Vivat Rex*. Nous irons oultre s'il vous plaist, & parlerons de la seconde vie du Roy.

*De la deuxiesme vie du Roy, qui est ciuile & politique.*

**D**E la deuxiesme vie du Roy, qui est ciuile & politique, qui se dit estat ou dignité Royale, de tant vault mieulx que la seule vie corporele, comme elle est plus permanable par succession legitime, & que le bien commun vault mieulx que le particulier ou personnel. Et doibt estre chacun loyal subiect autāt ou plus songneux de faict & de parole, que ceste vie soit bien gardee au Roy, que de la corporele. Il conuient donc sauoir à quoy tient & gist ceste vie ciuile. Et nous auons parauant touché, qu'elle se garde en vnité. Riens ne peult durer sans vnité: Comme de claire saint Denis apostre de France, *Ultimo de diuinis nominibus*, & Boetius de consolatione. Or ne peult estre vnité de diuerses choses sans ordre ou ordōnāce. Et que est ce de ordre? c'est quād chacune des choses a ce qui luy appartient, & est en sō droit lieu.

*ordo est par vnum disparium, quia lex sua unicuique tribuens collatio.* Ordre ne se peult maintenir sans le lyen d'amour comme le monstre Boece souhaitant en tout le monde que tel amour gouuernast, s'as raillir, les hōmes cōme tout le mōde en est gouuerné en biē & vnité: *O felix hominū genus si vestros animos amorque celum regitur, regat!* Si cōclud que haine ou diuisiō cōtraire à tout ordre en ordōnāce de struisēt ceste vie ciuile & politique. C'est la dētermination expresse du souuerain maistre Iesuchrist es lettres patentes de l'euangile, *Matthei xi. Omne regnum in se diuisum desolabitur.* Tout regne qui a en foy diuision trebuche en desolation. Et pour mieulx entendre cecy nous prendrons la similitude de ceste vie à la vraye, & dirons que comme la vie corporele se garde en la bonne proportion, ordonnance & harmonie des quatre qualites premieres, comme dict est, & c'est la complēction naturele, qui se garde en vne equalité de iustice naturele selon medicine. Pareillement ceste vie ciuile se maintient & garde en la coniunction des quatre vertus cardinales ou principales; prudence, attrempance, force, & iustice. Et ceste proportion se nomme par mot general iustice ciuile ou egale, *Prout iustitia est omnis virtus*, ou se nomme selon saint Augustin en vne de ses epistres Amour de Dieu: en laquelle amour se doit raporter, ioindre & vnir toute vertu. Si voyes que puis que vie ciuile se garde en vnitē, amour & en bōne ordonnance de ces quatre vertus, & se destruit par le contraire chacun nuist autant à la vie du Roy, & l'em

## Harengue au Roy

pesche comme il est contraire à ces quatre vertus: Et de tant comme il prie & desire, *Viuat Rex*: de tât doibt il labourer q̄ ces quatre vertus demeurerēt & regnent au Roy, & en son Royaume, prudence, atreurance, force, & iustice, autrement ce n'est que vain & faintif cry dire de bouche: Viue le Roy, & destruire de fait les causes necessaires de ceste vie. Et comment se destruisent elles? Par faulseté, par luxure, par paresse, & iniustice. Posons dōc & met tōs ie vous prie la parole du Sage dessus alleguee, *Rex qui sedet in solio iudicii intuitu suo dissipat omne malū*. Le Roy qui est assis au trosne de iustice, dissipe p sō regard tout mal ou toute malice. S'il destruit toute malice, il a vie ciuile saine & parfaicte. Mais regardons quel maintien il doibt auoir: & nous trouuerons les quatre vertus qu'il doibt auoir. Le Roy doibt estre assis, *sedet*, c'est en signe d'atrempance ou moderance, telle que le figura ou representa vn maistre, vn historien faiseur de grimaces à Romme, qui reprint son compaignon de ce qu'il representoit vn prince comme vn bataillant & voulant tout destruire, & il le contrefist en guise d'un homme qui est assis & pensif en signe qu'il doibt estre attempé & bien aduisé en tous ses affaires. Le Roy doibt estre au throne: c'est en signe de fermeté & de constance, comme vn throne est quarré dessoubz & ferme: *Sicut tetragonus sine vituperio inquit Aristoteles*. Il ne se doibt mouoir pour benediction ou malediction non plus que l'Ange de Dieu: le Roy doibt estre assis au throne non point quelconque: mais de iustice



& de equité. C'est la tierce vertu dequoy dit le prophete. *Iustitia & iudicium correctio sedis eius*. Le Roy doit bien diligemment enuoyer son regard par tout en signe de prudence & verité. Ce regard est le cōseil au quel comme en l'œil ne doit estre empeschemēt de pouldre d'auarice, ou d'enfleure d'orgueil & presumption, ne fumee de haine, ne grosses humeurs de charnalité, ne tache q̄lconque de mēsonge ou duplicité. Le Roy tellemēt assis au throne de iustice destruit par son regard toute malice. Le m'estudiois deduire quatre poĩts par histoires de cōcordāces en regardāt au secret parlemēt de ma pensee l'estat du Roy & de son Royaume, quāt me semble que l'ennemy de l'humain lignage & de tout biē s'estoit efforcé d'enuoyer son aîné filz maistre capitaine: peché le vilain tirāt faulx traître & desloyal à Dieu son souuerain seigneur. Pourquoi faire? Las pour batailler & destruire ces quatre vertus, pour subuertir ce throsne de iustice Et par ainsi pour oster & meurtrir toute vie ciuile du Roy & du Royaume, que ia ne face: N'estoit pas seul ie vous dy bien, la grant cōpagnie mauldicte des sept vices capitaulx & mortelz luy estoïēt en aide: orgueil, enuie, ire, auarice, paresse, luxure, & gloutōnie. Auecques les autres detestables fauldoiers & cruels pillars sans nombre: auec vne cōmune volūté & coniuration de mettre à mort toutes vertus, amener tous maulx tant de peine cōme de coulpe. Leurs souldes & gaiges sōt la mort, *Stipendia peccati mors. Roman. Sexto*. Si i'ay eu peur effroy horreur en çe considerant, encores fremis ie

## Harengue au Roy

& tréble quand il m'en souuiét. Certes ie ne pour roie dire la disme, non la centiesme partie des pechez douloureux & angousseux que vouloit faire peché vilain & traître ne tous ses alliez & assaulx perilleux contre ces belles vertus. Je aduisay en especial quatre mauldits pillardeaux, mais grâs pillars, qui soubz vmbre de bien aucunesfois & d'amour à descouuert affuioient & se lançoient contre ces quatre vertus chacū au sien: Flaterie & méfonge contre prudéce & verité: Delit voluptueux, paresseux & oiseux contre force & stabilité: Baratarappeux, contre iustice & equité: Estar oultrageux, cōtre attrépance & sobriété. Or sçauoit bien l'ennemy de l'humain lignage que par ces quatre faulx souldoiers pourroit estre destruicte la vie ciuile de toute la chose publicq en chef & en mébre qui le laisseroit faire. Car par eux se dissiperoit nō pas seulemēt l'estat de la Royale seigneurie, mais chacun des trois estatz subietz qui gardēt & entre tiēnēt cest estat souuerain. Ceux sōt l'estat de Clergé: L'estat de Cheualerie: Et l'estat de Bourgeoisie. Et est par ce le flateur & mensonger contraire aux clerks & conseillers ou doit estre prudence. Pour conseiller delitz voluptueux contraire aux cheualiers ou doibt estre force & constance pour batailler. Baratarappeux contraire aux iusticiers ou doit estre equité pour bien iuger. Mais estat oultrageux est generalmente contraire à tous grans & petits, ou doit estre attrépance & sobriété pour foy bien maintenir & aider. Estat de foy est bon, preux & honorable, soit en Clergé, soit en Cheua

lerie, soit en Bourgeoisie: mais si outrage se ioinct & se marie à estat, c'est tout perdu. De ce mariage ne naist que treshôteuse & mauuaise ligne. Quand outrage se couple à estat de Clergé, il en naist sacrilege & symonie. En estat de Cheualerie, il en naist pillerie & tyrannie. En estat de Bourgeoisie, il en naist vsure & baraterie. Pource m'estoit aduis estre chose tresprouuable & necessaire de reueler & de clairer estre traitresse entreprinse par ces quatre meurtriers, contre ces quatre vertus bonnes gardes du Roy & de sa vie. Pourquoi? Pour les escheuer & garder. En ce me sembla estre & semble encores la principale intention de la fille du Roy pour y trouuer & de fait adiouster remede conuenable, sans trop descédre à matieres particulieres, qui appartiennent au grand conseil du Roy: Mais entant que bonne doctrine de predicatio se doibt estendre, & non pas tât pour enseigner chose que vous Tresnobles seigneurs ne sachez bien, comme pour esmouuoir & enflâber à poursuir ce que vous scauez desia tresbien. Comme on presche de la mort, non pas pour chose que on ne sache bien que mourir fault, mais pour soy humilier & pèser à bien mourir. Vray est que en ce propos & meditation suruint vn grand debat au secret parlement de ma pèsee: Car dissimulation faincte & poureuse fille de flaterie, mèsongeuse engendree par propre amour, couchee avec singulier prouffit sefforçoit à me faire du tout taire & cesser. Sedition cruelle oultreuidee & folle tiroit tout au cōtraire, en ceste matiere par la premiere dissimulation,

## Harengue au Roy

& dict à quoy pensois tu bel amy, que veulx tu faire ou dire, veulx tu refformer ou corriger le monde? Sçache qu'il est trop vieux. Le corriger ne feroit que l'empirer, comme d'une vieille poyelle, en laquelle pour estoupper vn pertuis on en fait deux ou trois: ou comme en reparamt vne vieille robbe ou maison, tout se derompt & chet comme on le voit souuent. Laisse quoy, tout se corrigera & amendera de soy mesmes: oncq' ne fut que le fort ne mengeast le foible: le riche, le pauvre. Tousiours auront meschans gens du pis: c'est bien trauaillé en vain de tendre au contraire. Et n'aduises tu pas qui tu es? En quel peril tu te mets de perdre estat & vie? Veux tu mettre ta bouche au ciel, parler des grâs seigneurs, ausquels on ne peult dire, Pourquoy faictes vous ainsi? *Cur ita facis?* Tu as trop maigre dos pour telle charge porter. N'as tu pas leu es histoires quels loyers en ont rapporté tous ceulx qui ont voulu corriger & endoctriner grans seigneurs en la faueur du bien commun? Zeno, Socrates, Tulle, Boece, & autres l'ont senty par leur mort. Seigneurs, mon amy, de meurent tousiours seigneurs. Et que fait le commun? Il se mue & tourne plus que fueille de poulpier. Tousiours ensuit fortune & aduenture, comme dit Iuuenal. Maintenant louera l'un & le portera iusques au ciel: tournez vostre main, aussi tost le laira au fiens. Que dis ie fiens? mais le persecutera. Lis le chapitre des ingrats, au cinqiesme liure de Valerius Maximus, tu trouueras que les Romains occirent & mirent à exil leurs principaulx



adiuteurs, comme furent Romulus, Furius, Camillus, Scipion Affricain, Scipion le Mineur, Coriolanus, Scipion Nasica. Pareillement fist Carthage à Hannibal: Les Lacedemoniens à Licurgus. Ce n'est doncq' riens d'aide ou faueur de commun: fol est qui si fie. Qui commun sert, nul ne l'en paye: & sil mesprennt, chacun l'abaye. Voire par Dieu tant face bié. Si te repose & me croy, il fault temporiser, ie te dy vray. Il fault dissimuler, c'est le conseil du prophete, *Amos quinto, In illo tempore vir prudens tacebit quia tempus malū est.* Et n'est le temps tresmauuais? Certes si est. Si te fault taire: qui de tout se taist, de tout à paix. Laisse aller, laisse chacun: bien se conuienne. Sauue soy qui peult. Croy ce que dit Ptolomee, Sage est à qui n'en chault en quelque main le mode soit. Ne fay pas des grans seigneurs desquels tu as receu & peux receuoir grād' faueur, tes ennemis pour neāt faire. Car dy tout ce que tu voudras, tu vserois cent langues d'asier, car riens ne s'en fera. Que prouffiterōt paroles quād la congnouissance des maulx tant grās & tant miserables ne esmeuēt de riens à compassion, & à prouision mettre. Viue le Roy, viue comme il est accoustumé sans retrancher son estat ou amoindrir sa seigneurie Royale. Il n'est point d'autre meilleur seigneur. Qui sont les subiects aujourd'huy qui sont pour corriger leur seigneur? Et les disciples pour enseigner leurs maistres? A eulx est d'obeir tant soyent les seigneurs desordonnez, selon le commandement de saint Pierre, *Prima Petri tertio.* Mais aussi dis moy par lequel bout se doibt com-

## Harengue au Roy

mencer ceste reformation : & à quelle fin on en viendroit ? Ainsi parlementoit dissimulation en voulant difficulter la matiere pour conseiller à tout laisser comme sobre & sage ce luy sembloit : Quand seditiō cruelle qui moult despitement & impatientement entreroit dissimulation entrerom proit soudainement sa parole, en la blasmat comme doubteuse, suspicionnee & aneantie comme contraire au bien commun, & espouventable comme celuy ou celle qui vouloit laisser perdre le Roy & Royaume, & trebucher à male mort ciuile sans riens dire. Puis en fremissant par courroux & ire & bien semblant furieuse ( telle estoit elle voirement ) commença à dire, Et comment demouront tousiours les choses en tel estat ? Mais destruction, misere, angoisse & desolation, estre plus fers que bestes muettes, pillez, rongez iusques aux os sans y laisser rissle ne raffe. Voire & quels vsages, mais abuz ords & vilains. He Dieu ! las trop mieulx vouldroit mourir de mille mors, que tels mauulx endurer, meure qui doit mourir, si en sera quite, sans telle langueur de douloureux tourment. Dieu qu'est cecy ! O ciel, O terre, O iustice, O pitié : & ne trouuera on qui aime le bien commun : qui se expose pour la vie publique du Roy & du Royaume ? Viue le Roy. Ie le veulx bien : mais soiēt occis les faulx traistres qui gaste le Roy & son Royaume, soiēt occis, dis ie, & exterminiez : car qu'on face tant d'ordonnances, de promesses & de loyautez que l'on vouldra, iamaïs n'aura bié en ce Royaume, fors rapine & tyrannie, tant que  
aucuns

aucuns viuront : ils sont comme le fer ou l'espine en la playe qui ne la laissent venir à guerison. Mais accord y aura: accord voire, quel accord! comme deux loups par aduventure à deuorer vne brebis. Las ou sont ores les preux & les vaillans champions de la chose publique, qui pour le bien commun contre les tyrans exposoiēt iadis leurs corps & cheuāce, Iudas Machabæus, Mutius, Themistocles, Trasibulus, Mathatias & autres: ou sont tels personnages pour deliurer ce Royaume de miserable oppression? A eulx doibt estre la voye de faire ce que dit Seneque, que il n'est sacrifice tāt plaisant à Dieu comme la mort d'un tiran. Ils sont abandonnez à tous ceulx qui en veulent deliurer le pais, mais qui peult ce estre, que on ne trouue qui vueille ou ose dire la verité: ceste paoureuse dissimulation folle clost à tous la bouche, les bons prochains ou sont ils, que ne parlent ils? Facent ce que doibuēt faire & aduiēne ce que pourra. Les mauulx qui regnent & les pechez ne sont ils pas assez grās, si detestables, si treshorribles, & abominables en la foy & bōnes meurs, que terre ne les deuroit soustenir, mais engloutir. Les pierres mesmement les deburoient accuser, & feu, & glaue sans respit exterminer. A ce Roy furieux de sedition, ie tour efroyé destourne le visaige sans plus pouuoir endurer la rage qu'elle disoit, tellement que bien apparoissent ma contenance: lors tire hors de dessoubz son habit dessire grand foison de libelles diffamatoires, composez partie par detraction sa cousine, & male bouche, partie par suspicion melancolieu.

## Harengue au Roy

se, partie par bruit de ville & renommee, qui dit tout à la volée soit vray ou soit faulx, comme dit Virgile. Puis en les desployât par deuant moy, voyez, cy dist elle, assez matiere de parler & proposer deuant le grand conseil du Roy selon ce que tu y es ordonné, pour querir reformatiō. Onques mort ne sonnay: car i'apperceuz dissimulatiō qui s'aprestoit de respondre. Lors s'efforçoit sedition de plus crier en hault cry braire & se debatre, & bien sembloit que apres telles parolles viēdroient tantost bastueurs si meslee se faisoit, ou si dissimulatiō plus mort sonner osoit. Ne sçay que i'eusse fait si discretiō la sage, ainsi le voulut Dieu, n'eust esté enuoyé par la fille du Roy, la mere de sciencel'Vniuersité de Paris. C'est sa familiere amye discretiō, s'auança pour deschasser ces deux monstrueux vices, dissimulation, & sedition vices sont & pechez & riens ne valent. Car dissimulation fault & timidité, sedition & temerité, discretiō tient le droit chemin Royal, sans decliner à dextre de dissimulation ou à senestre de sedition. Si est haineuse à toutes les deux car dissimulation repoute discretion estre oultre cuidance quand elle ose dire verité tant soit elle profitable s'elle desplaist au seigneur: sedition la repoute faincte & traistire quand elle se taist de riēs, & qu'elle ne rompt tout & abat tout: mais ne chault guerres a discretion de leurs haines ou rumeurs, à l'exemple de Quintus Fabius Maximus, *Qui non ponebat rumores ante salutem*, il luy suffist qu'elle ait Dieu, conscience & verité pour soy & qu'elle profite au bien commū. Et ie procederay



doncq' en oultre sil vous plaist selon les instructions faictes & ordōnees par sage discretiō comme ie croy . Hors doncq' soient dissimulation & sedition, & si par auanture ie n'ay peu retenir mot à mot tout en propre forme les instructions de discretion la bonne maistresse: c'est ma fragilité & ignorance. Car mon esprit est rude, ma memoire labille, malice ce ne sera pas ie l'affirme. Je raporte & refere tousiours à discretion tout mon propos, par quelque mot ie l'expose, c'est que le Roy viue, viue dis ie de vie non pas seulement corpore le cōme dict est, mais ciuile & mystique. Laquelle se tiēt & garde par vnitē de luy comme du chef auecq' ses subiects, qui sont comme le corps ayant diuers membres selō diuerses offices & estats qui sont en ce Royaume . Pourtant vn Roy comme il n'est pas personne singuliere mais est vne puissance publique ordōnee pour le salut de tout le commun, ainsi comme du chef descent, & s'espand la vie par tout le corps . Et à ce furent ordonnez les Rois & les princes du commencement par commun accord de tous, & tellement doibuent perseverer en telle maniere . Si nous arrestons icy vn peu en ceste similitude, & pour fonder seurement ce qui est dit & à dire, nous prendrons quatre veritez tresveritables, claires & certaines pour le seruire singulier que doibt la fille du Roy, à luy & à tous les seigneurs, plus beau seruice ne leur pourroit el le faire, que de leur monstrier cōstamment la verité de la foy & saine doctrine & bonnes meurs contre les faulx informateurs: qui le songent apart &

## Harengue au Roy

en tenebres, & graces à Dieu, & à vous messieurs, quand maintenant & autres fois vous les oyez voluntiers.

*Comment par l'enseignement de nature tous les membres en vn vray corps s'exposent pour le salut du chef.*

**L**A premiere verité, ainsi que par l'enseignement de nature tous les membres en vn vray corps s'exposent pour le salut du chef, pareillement doit estre au corps mystic des vrais subiectz à leur seigneur. Mais d'autre part le chef doit adresser & gouverner les autres membres, autrement ce seroit la destruction : car chef sans corps ne peut durer. Ceste verité est contre l'horreur de ceulx qui ont voulu dire, qu'un seigneur n'est de rien tenu ny obligé à ses subiects, qui est contre droit diuin & naturele equité, & la vraie foy de seigneurie. Car comme les subiects doivent foy, subside & seruice, aussi le seigneur doit foy, protection & defence à ses subiectz. Vne bonté l'autre requiert, selon les docteurs. Le peché de Lucifer fut en ce qu'il vouloit seigneurier ou dominer sur toutes autres creatures : sans estre de rien obligé à leur garde ou seruice comme Dieu. Il deuoit scauoir le contraire que la seruitude est plus grande, de tant que greigneur est la seigneurie. Pourquoy dont s'appelleroit le souverain pasteur le Pape serf des serfs ? Plus reçoit vne creature de grace, & plus doit de seruice à Dieu, comme dit saint Gregoire en l'homelie. *Tanto esse humilior &*

*ad seruiendum promptior, quisque debet esse ex numine quanto se obligatiorem conspicit esse in reddenda ratione.*

A ce faict que Traian Empereur veid, luy estant ia à cheual, & allant à la bataille, vne femme qui s'escria. O Empereur tu domines & ie souffre telle douleur & iniustice, mon fils innocent est tué: L'empereur s'arresta & dist qu'au reuenir de la bataille, il luy feroit iustice. Et si tu ne reuiens point dist la bonne femme: Respondit Traian, que son successeur luy feroit iustice. Nô pas, dist la femme, tu me doibs iustice, tó successeur aura assez à faire à soy, il ne l'acquitera pas. Je te requiers iustice que tu me doibs. L'empereur cõgneut bien qu'elle disoit verité, si descendit de cheual & examina la cause & consola la femme, dequoy aduint que son image fut mise en publicq, representant ce iugement, & en la voiant Sainct Gregoire en eut pitié, & par sa priere fut saine. Cecy preuue nostre verité: & ce aussi que chacun Roy iure, & chacun prince garder son peuple. Et si le seigneur ne les traite loyaument comme subiects, ne les traite point comme seigneur, selon la responce que fist Domitius à vn conseiller. Si tu ne m'as & reputes comme Senateur, ie n'oyray point comme cõsult.

La deuxiesme verité. Quant au regard corporel, comme il n'est chose plus cruelle, horrible & hideuse, que veoir vn corps humain, ou naturel se deschirer, ou se desmembrer par morsure ou autrement. Semblablement au regard spirituel de raisõ, n'est pas moindre cruauté: mais trop plus grande au corps mistiq, si les parties sont di-

## Harengue au Roy

uerfes & diuifées, & fe perfecutent l'une l'autre  
côme feigneurs leurs fubiects, ou les fubiects leurs  
seigneurs, comme perfecutent en ce que l'un ofte  
l'office & droit de l'autre: car naturelemēt toute  
chose defend fon droit, & reboute fait par fait,  
violence par violence. *Vim vi repellere licet.* Si ap-  
pert que ceux errent qui diēt aux Princes, que tout  
est leur, & qu'ils peuent faire du tout à leur de-  
uife & volonté en prenant tout & attribuāt à soy  
ce que les fubiects ont sans autre titre. Qu'est ce à  
dire cecy fors prenez tout, & que l'enfuit il? Il s'en  
enfuit tel inconuenient, comme si le chef vouloit  
attirer à soy tout le sang, l'humeur, & la substāce  
des autres membres: que seroit ce? n'est point de  
doubte, ce seroit sa propre destruction: chef sans  
corps ne peut durer: corps sans soustenance perit  
tantost. Si appert outre, que celuy clerc entēdroit  
mal & folement le texte de la Bible, qui contre ce-  
ste verité voudroit tourner les paroles escriptes  
au viij. chap. du premier liure des Rois. *Hoc erit ius  
regis.* Car le vrai sens literal cy, & ailleurs, & en e-  
special *Deuter. xviij. ca.* Est tout au contraire, & aussi  
tout bon iugement de raison naturele, laquelle ne  
est oncques contraire au droit diuin. Si Roboam  
qui succeda à Saul apres Dauid, & Salomon eust  
peu tout prendre par droit diuin: pourquoy eust  
il perdu la dixiesme partie de son Royaume: quād  
par le conseil des ieunes, & à la flatterie il vouloit  
acroistre les exactions sur le peuple plus que Salo-  
mon? Dauid mesmes: pourquoy eust il esté puny  
de ce qu'il deuifa l'heritage de Miphibosech à Siba



ſō varlet? Acab, pourquoy eust il eſté reprins de ce qu'il voulut auoir la vigne de Nabot? En bōne foy ie ne ſçay dont celle erreur peut eſtre venue. Car ce dire, ſeroit rendre les hommes ſubietz comme brebis ou pouſins & les ſeigneurs ſur eux, comme eſcouffles ou loups rauiffans, ſi viendroît tout à la parſin à deſtruction: mais pour ôſter le fondemēt ou ceſte erreur ſe fiche, diſons premieremēt, qu'il ne ſuffit pas à entendre la trefnoble & ſaincte eſcripture, qu'on ſache ſeulement la ſignification grāmaticale & vulgaire des mots, ains eſt requiſe grāde & longue eſtude & inſtruction en toutes autres ſciences de Philoſophie & Logique, comme es ſaincts docteurs qui ont expoſé la ſaincte eſcripture par inſpiration diuine, & comparer l'vn paſſage à l'autre. *Puteus altus eſt.* C'eſt vn merueilleux & profond puiz: autrement il ſenſuiuroit qu'vn chacun Grammarien qui entendroit Latin, ou vn qui auroit la Bible en François, ſeroit vn tresbon Theologien bien toſt, ce qu'il n'eſt pas.

Mais eſt ocaſion trefgrande & commune de trebucher en hereſie comme Iulié l'apostat, Heluidius, Iouinian, & les Turelupins firent des mors de l'eſcripture qui ſont ſouuent equiuoques & ſe prennent en vn lieu autrement qu'en l'autre: ou qu'en commune Grammaire, & conuient accorder l'vn paſſage par l'autre, & par la cauſe & circonſtance du parler. *Intelligentia dictorum, ſecundum Hilarium, ex cauſis aſſumenda eſt dicendi.* Exemple en ce mot icy de Latin *Ius*, Il ne ſignifie pas ſeulement droit ou iuſtice, mais ſe prend quelquefois pour puiſſan

## Harengue au Roy

ce qui n'est pas iuste: cōme icy selon la glose ordinaire, *primi regū viij. Hoc erit ius regis*, se prēd pour ex actiō, *versus. Ius aqua, ius rectum, ius dicitur esse potestas.* Comme ce mot Roy se prend aucunes fois pour ty ran. *Osee xij. & Job xxxij.* Et benediction pour malediction. *Job tertio.* Et loy de Iustice pour desroy & exercice d'iniustice. *Sapientia tertio.* Et Dieu pour le diable, *prima ad Corinth. viij.* Disons doncques ces exactions, desquelles parle ledict, viij. chapitre, se nomment droict du Roy pour l'une de ces trois choses. C'est à sçauoir, ou pour iuste punition du peuple, qui contre le vouloir de Dieu demāderent vn Roy, ou pour publique subuētiō & aide en cas de neccessité raisonnable, ou pour seu le nūcupation ou nomination, pour ce qu'ainsi les nomment ceux qui les font, cōme on dit le droict de la porte baudet. Et l'aucun dit, puis que le peuple doibt estre ainsi puny, le Roy le peult iustemēt faire. Le respōs que par ainsi on prouuerait, que les ennemis & les tirās font & ont fait iustemēt leurs persecutiōs & afflictiōs. Dieu ne peult estre moqué, il sçait bien leurs intentions. Si vn autre dit que le prince a neccessité souuent de faire ce qu'il fait: on doit sçauoir lors ce dont procede telle neccessité, & si elle viēt de volūtē. Car si vn seigneur veult plus tenir de gens au triple ou quadruple qu'il ne doibt, ou qu'il n'est neccessité a son estat & d'abondance, par ce il se met en neccessité, est il excuse? ie vous dis certes que non: mais doublement accusé. Et encores plus quant riens ne tourne à la deffence du bien commun, mais en mal vsaige &

disipation, qu'ilz crient à Dieu vengeance, & il les exaulsera. *Propter miseriam inopum & gemitum pauperum nunc exurgat, dicit dominus.* Mais que respōdrons nous aux loix qui dient, *Omnia sunt principis.* Tout est au prince. Et Lucain dit, *Omnia Caesar habet*, tout est à Cesar: nous respōdrōs par obiectiō, cōtre obiectiō, cloux contre cloux. Dit l'Apostre en plusieurs lieux en parlant des Chrestiens, que tout est nostre, *Omnia nostra sunt*, tu respondras que voirement tout est nostre pour bien vser, c'est vray. Pareillement dis ie que tout est aux princes, pour bien vser selon Dieu & iustice & selon raison, c'est à dire à la iuste & necessaire deffence de son pais, comme il doit exposer ses biens, voire son propre corps à ceste fin. La tierce verité. Comme venin ou poison occist le corps humain, pareillement tirānie est le venin, la poison, la maladie qui met à mort toute vie politique & Royale. Pourquoi? pource que tyrannie veult tout tirer à son propre prouffit, & à conditions denatureles, toutes cōtraires à bonne vie ciuile, desquelles parla longuement Aristote au cinqiesme liure de ses Politiques, & se raportent à trois, *Pauca scientia, de se diffidant, sint & egeni: Sic rege subiectos* dire *tiranne tuos*, Le tiran veult que ses subiects puissent peu: sçachent peu, & se entraimēt peu. Si est ce chose bien cōtraire à bon gouuerne mēt Royal, qui tiēt que en ses subiects soit puissance, sapiēce & amitiē, en ensuiuāt le bel image, imitation, ou exemple de la benoiste trinité. Et que pourroit pis faire l'ennemy mortel du peuple, ou le prince d'enfer, fors que peuple fust poure & di-

## Harengue au Roy

uifé? Trop mieulx vouldroit estre sans prince comme les fables dient des raines, ausquelles fut baillé pour Roy vn serpent qui les deuoreroit, de ce viét que le Tiran opprime le peuple par gens d'armes estranges, par tailles, coruees, par exactions, par meurtrifsemens secretz, il empesche estudes pour sciences non acquerir, il deffend toutes assemblees honnestes & nourrist diuisions par rapports faulx & enuie. Conclusion, oultre que se le chef, ou aucuns des mébres en la ciuilité venoit à tel inconuenient qu'il vouldist receuoir ou introduire le venin mortel de tyrannie, chascun membre en son endroit de toute sa puissance y deuroit obuier, voire par moiens conuenables & telz que pis ne s'en ensuiuiſt, ilz ne quierent pas se le chef se deult vn peu que la maï se frape, ce seroit fait de fol, il ne couient pas tantost le trancher ou separer du corps, mais le mediciner en toutes douceurs tant par bones paroles comme autrement à l'exéple des bons medecins, il ne seroit chose plus defraisonnable ne cruelle que vouloir empescher par sedition & tyrannie, ie appelle sedition, rebellion populaire sans rithme & sans raison, elle est pire souuent que tyrannie, Lucius scilla fut appellé à Romme pour repeller la tyrannie de Marius, mais il fist pis que Marius, car ainsi comme disent aucuns, *Excesſus fit medicina modum*. La medecine desmesuree greua plus que la principale maladie, ce dit Lucain. Ainsi fault à merueille grand discretion, prudence & attempance à bouter dehors tyrannie, pourtant doiuent estre ois les sages philosophes, iuristes, theo-



logiens, & aussi gens de tresbõne prudence nature  
le & de tresgrãde experience, *in antiquis est sapientia*,  
car on ne doit point tãtoſt iuger vn Seignr tirã fil  
n'est pecheur en plusieurs cas, mais q̃ ce ne soit ma  
nifeſtement contre la fin de ſa ſeigneurie & en ſub  
uerſion du bien public. Puiffance cõme dit l'Apo  
ſtre n'est pas dõnee à quelconque ſeigneur en ſub  
uerſion mais en edification, & pource il deſſert de  
la perdre qui en abuze. Parquoy il appert que ceux  
n'aideroient tourner en folles erreurs ou condi  
tion de tyrannie, car n'est maniere autre plus cer  
taine que vn Roy ou prince ſe perdift en corps &  
en ame & toute ſa ſeigneurie. Car tyrannie & infi  
delitẽ comme deſnaturele ou violence contre Di  
eu & toute raiſon ne peuuent longuement perfe  
uerer, dit le Sage, *Sapien. ſecundo, Oportebat enim illis  
ſine excuſatione quidem ſuperuenire interitum exercenti  
bus tyrannidem*, il cõuenoit que ſans excuſation ſur  
uint mort à ceulx qui exerçoient tyrannie. Violen  
ce auſſi riens ne peult durer dit Iuuenal, Que peu  
ſouuent tiran meurt de mort naturele, il eſt hay  
de Dieu & du monde, & n'est preſque ſi petit ſ'il  
veult ſa vie auanturer pour oſter la vie du tiran  
qu'il ne puiſſe trouuer maniere & voie de le tuer  
& deliurer le pais. Si voyez que les Rois ou prin  
ces doiuent volontiers oir ceulx qui ſcauent em  
peſcher le venin de tyrannie qui ne les occupe, &  
vaut mieulx qu'ils aient moindre ſeigneurie, qui  
ſoit raiſonnable, ſaine, & durable & bailler quel  
que reſtraintif que le chef ne tire trop a ſoy l'hu  
meur & le ſang des autres membres. Ce n'est pas

## Harengue au Roy

greuer le chef, mais l'aider. Telle respōce fist Theopompus à la femme, qui se complaignoit de ce q̄ par certaines loix il auoit restrainct sa puissance: (comme le Roy se soubsmet à la iustice de parlement en plusieurs cas) C'est grand honte, dist celle femme, que vous laissez moindre puissance à voz enfans que vous ne l'avez trouuee, il respōdit, ie la laisse moindre, mais plus durable. Pourquoi plus durable? Pource qu'elle est plus raisonnable: voire mais diras tu, elle estoit honorable. Sachez que non, mais de tant est plus hōnorable, car estre subiect à raison est souueraine seigneurie & souueraine dignité, hōneur, noblesse & ingenuité. Et en ce le Roy ne se soubsmet point à ses subiects, mais à raison, à laquelle selon droit diuin & naturel, chacun seigneur & autre doit obediēce & subiection. *De his Seneca, Si vis omnia tibi subiicere, subiice te rationi.*

La quatriesme verité. Puis que le Roy sans subiects, & subiects sans Roy, ne peuuent longuement durer, & raisonnablement vn accord est necessaier vnion paisible ensemble par connexion des quatre vertus dessus nommees, ensemble des quatre qualitez premieres au corps naturel, moiennāt l'operation & cōsideration diuine du saint Esprit qui fait ceste consolation & vnion au corps mistique, comme l'influence des cieux au corps naturel. C'est la determination expresse de tous Philosophes, Iuristes, Poetes & Theologiens, en signe de ce le souuerain Roy des Roys, se nomme prince de paix, *princeps pacis*. Aristote par l'auctorité de

Homere, *secundo Ethicorum*, determine que la seigneurie Royale est comme du pere aux enfans; ou comme du pasteur aux brebis, selon ce qu'Homere nomme le Roy des Grecs pasteur du peuple, & Dieu veult que nous le nommiōs pere & pasteur. Octauien Auguste quand on le nōma en publicq', seigneur bon & iuste, defendit ceste nomination & voulut qu'on le nommast pere du pais. Nous auons dict par l'autihorité de Salomon, qui est interpreté Roy de paix, que la fin du Roy est dissiper tout mal, mais quelle chose est tout mal? Regardons qui est tout bien, dit saint Augustin, *super illud, Pax super Israel*, que c'est paix, guerre dōc ou diuision est tout mal, pourtant la fin du Roy doibt estre paix en ses subiects, comme est escript au prologue des decretales, *Rex pacificus, &c.* A insi le congnoissoit & vouloit faire le grand Roy Artaxerxes autrement dict Assuere, qui en son epiistre *Hester decimo*, tesmoigne qu'il n'a point voulu abuser de puissance, mais qu'à son peuple vst de paix, qui est de tous hommes mortels desiree. Bien va se Dieu plaist, quand nous auons tel & si ferme fondement & quareure de ses quatre veritez. La bonne vie ciuile du Roy y sera bien stable: car selon le Sage, verité & misericorde gardent le Roy, *proverbiorum vicesimo*, Et c'est nostre desir, *Vivat Rex*, Viue le Roy. Mais reuenons ou nous estions & venōs à reueler la trahitreuse entreprinse des quatre soldoyers de peché le tiran, voions comment ils nuisent aux quatre belles vertus dessus nommees, Et premierement.

## Harengue au Roy

*Du flatteur menfonger qui est contre la premiere vertu,  
c'est à scauoir prudence.*

**P**rudence est la vertu qui doit mener toutes les autres, *Auriga virtutum*, par quelle maniere? par la lumiere de verité: & par sa fille discretion, en monstrant tout de premier la fin de chacune entreprinse, *Rerum exitus prudentia metitur*, puis delibere & iuge des moiens conuenables pour venir à ceste fin, autrement cest aduerture se rien vient à bon effect. C'est laide chose à vn Prince, comme disoit Scipion Affricain, alleguer & dire *Non putavi*, Je n'y pensois point. Il doit tout aduiser parauant, & non pas soy fonder sur vaines rumeurs ou rapports, comme dit Iulius Cesar, que les François font, & pource faillent souvent à leur entreprinse, les entrees des grâdes entreprinsees comme de batailles sont larges, les issues trop estroictes, il faut donc bien aduiser comment on y entre pour en issir, & sans estre agrippé comme poisson à la nasse. Exemple d'un qui demanda vn conseil par ou il retourneroit d'un voyage, qu'il auoit entrepris de faire. Mais escoutons, que fait le flatteur menfonger contre Prudence, dieux quel varlet, c'est l'enchanteur du Diable qui charme les seigneurs, & fait apparoir de faulseté verité, de folie sens, de neant grand chose, de glorieux fait fols, & de fols hors du sens. C'est à dire hors de bon iugement & de raison, *Hic profecto ex stultis insanos facit*, comme dit Terence. Qui deceut Lucifer, & le mua d'Ange en diable, flaterie de soy



mesme & de ses adherans. Flaterie commença des lors, & fist trebucher son maistrè de si haut si bas, de si sage si fol, que feront les hommes, comment s'en garderont ils? Qui deceut Eue & Adam, & les mua d'immortalité en mortalité, de tous biens en tous maulx? Flaterie de l'ennemi qui leur promettoit estre comme dieux. Et ne fut ce mie flaterie qui fist entendement à Nabugodonosor, Alexandre, Acofdroc & autres que ils estoient dieux. O quel erreur & souueraine folie! cestoient Dieux en songe, ou en personnage, ou en phantasie, ou en enchanterie! Tantost soufflez cy, & il n'y à riens, *Velut somnii surgentium domine, & cetera.* Et à bref dire, il n'est rien selô Iuuenal: que grans seigneurs ne puissent croire de soy, se ils se abandonnent à flaterie. *Nihil est quod de se credere non possit, cum laudatur diis aqua potestas:* Il n'est religion si estrange de laquelle on ne croie plustost faulseté que de soy mesmes. Quelle merueille si les seigneurs se trouuent deceuz, quand la verité retourne ou par aduersité, ou par la mort qui monstre clerement la faulseté de telles estimations? Alexandre receut vne plaie en bataille, & lors il se congneut & dist, les gens me nomment fils de Dieu, mais ceste plaie me monstre que ie suis homme, le flateur, le mauuais portier qui souuent ouure la porte à l'esprit de mensonge & de faulseté: lequel prend maintenant vn chapperon fourré & vne chappe, & semble prelat ou clerc: maintenant est en habit de cheualier ou escuier, aucunefois en habit de varlet: parquoy tout va à deception selon la vision de

## Harengue au Roy

Micheas, *terty Regum Ultimo*. Flateur est le mene-  
strier ou trompette qui tousiours chante de fain-  
cte musique, & mue sa notte selon ce que le sei-  
gneur veult chanter ou deuïser: c'est l'image du  
mirouer qui rit quand on rit, pleure quand on pleu-  
re, *Semper gaudet alienum sumere vultum*. Dira vn sei-  
gneur, il fait chault, le flateur dira qu'il sue, si le sei-  
gneur dit incontinent, il fait bien froit, le flateur  
dira qu'il tremble. Souuent i'ay veu en vn mesme  
disner ce cas ou semblable, & me donnoy merueil-  
les, que le seigneur ne l'apperçoit, ou se il apper-  
çoit, comme il ne se mocquoit ou reprenoit: le fla-  
teur tourne tousiours la torche du conseil, par ou  
le seigneur veult aller, combien qu'il doibt trebu-  
cher, ou se rompre le col. Tout tel me veulent les  
seigneurs, dit le flateur, & tel me auront ils: par  
Dieu ie ne contrediray ia à leur autorité ou volū-  
té, tant fois certain que mal en viendra soit à eux,  
soit à leur peuple, pourquoy me mettray ie en  
leur indignatiō? *Indignatio principis mors*. L'indigna-  
tiō du Prince est la mort. Et mon Dieu ie ne vueil  
pas mourir martir, mais confesseur: taillent, ron-  
gnent, pillent, efforcent: & que me chaut, mais que  
i'aye part à la proie, ou que prouffit m'en vienne?  
Escoutez messeigneurs que dit le flateur, & cuidez  
vous que flateurs se mocquent, ne doubtez que  
ainsi le fait, defait: & encores pis il enflambe le sei-  
gneur qui l'escoute & enfle du vent de vaine lou-  
enge: parquoy le seigneur deuient plain de folle  
opinion & iuge de soy merueilles, & ce n'est que  
vent comme de trois poix en vne velsie enflée, la  
pointe

pointe d'une aiguille abat toute sa venterie, & dechet ! de toutes ses entreprinſes. Et qui eſtes vous ſire ? dit le flatteur : regardez vous, maintenez voſtre dignité : vraiment terre ne ſouſtient ſeigneur qui ſoit pareil à vous en nobleſſe de cuer, en proueſſe, en beau parler, en grand ſens & prudence : les autres ne ſont que beſtes au regard de vous. Puis blaſme à la fois le ſeigneur par ieu, & comme en heraudant dit, mauſgré celui là & l'autre : & quoy ſi re vous eſtes trop humble & trop religieux, trop doulx, trop large, & trop piteux : que vous chault de ces vilains, ou de ces chaperons fourrez, ou de ces turlupins religieux ? Monſtrez, monſtrez que ſoiez ſeigneur : & qui eſtes vous ie vous pry, que auez vous affaire d'autrui ? Qui ſeroit celui qui vous pourroit greuer, ou rien monſtrer, ou conſeiller ? Oyez meſſeigneurs quel aduocat : pleuſt à Dieu que verité à lencôtre reſpondiſt au ſeigneur, quand flatteur lui demãde Qui eſtes vous ? Et, Qui eſtes vous ie vous pry ? reſpond verité : Tu es vne poure miſerable creature ſubiecte à toute angoiſſe & tribulation, à froid & chauld, à douleur, à maladie & neceſſité ineuitable de mort : Tu es vn ſac plein de ſiens, terre & cendre, & pourriture : quelle robe que tu ayes, quelque or ou argët, ou pierre precieuſe, ou pompeuſe famille ſoit enuiron toy : quelle choſe (ie te prie) eſt ta chair qui toſt ou tard deuiẽdra charongne, voire trop puante viãde à vers ? Toſt ſera ce ie te dy biẽ : car en ſi bref temps n'a point de tard : & ſil eſt ainſi, eſueille toy vn peu : Ouure les yeux qui te ſont clos par flatte-



## Harengue au Roy

rie, & regarde quels seigneurs estoient à ce conseil, depuis quatre ou six ans, chacun les honoroit, chacun les redoutoit, chacun les flatoit, autant ou plus que toy: mais ou sont ceux de present, ou sont ils? pensez y bien: ils ont dormi leur songe, ils ont fait leur personnage: la mort en vn moment leur a donné echec & mat, & sont boutez en terre. Que leur proufite orgueil? Que leur vault s'ils ont opprimé & mené à douloureux tourment le menu peuple pour cōplaire aux flatteurs? Flatteurs les osteront ils de terre, & l'ame d'éfer si elle y est trebuchée? elle y est voirement, & toy en apres si la misericorde de Dieu pour penitence n'y met ou a mis remede. Terre, terre, terre, esconte la parole de Dieu, & qui est elle? *omnis caro fœnum*: Toute chair n'est qu'un peu de foin, & toute sa gloire cōe vne fleur des chāps. Pense bien que le flatteur est le prestre à l'ennemy d'éfer, qui châte les vigiles de ceux qui sont mors par pechez, enseuelis par mauuaise coustume, pursans desia par mal renommee, couuers de la tresdure, tresfroide & pesante pierre d'obduration de cueur, prests pour enseuelir au cimetiere d'éfer. Et dit en outre le flatteur en commençant ses vigiles, *Placebo domino*. Mais il va & continue trop mal: car il n'y a point *In regione viuorum*. Que dirons nous pl<sup>o</sup> des flatteurs? Flatteur n'est qu'un enuelopeur de paroles, quand vient au point de dire la verité, il quiert yssir par paroles à deux visages: par vn alibi forain, vn expedient, il ploye à tous vents, il suscite dissentiōs pour sēbler qu'il face la paix. Tousiours est en rithme & consonance selon la respōse



du regnard au lyon. Bien ſçait y ſſir de la chambre aux ſinges, & prédre de l'eau des fols pour auoir paix. C'eſt la mauuaſe corneille qui creue les yeux aux grâs ſeigneurs, ou les bende: puis ioue d'iceux aux chapeſols. Flaterie, à la parfin pour dire tout le comble du mal, eſt treſcontraire à Prudence. Pour quoy? pource q̃ elle iroduit faulſeté, & empêche que verité par le cōſeil d'autrui ne ſoit manifeſtee à celui qui ſe reputé plus ſage de tous les autres: mais à quel iugement? de flaterie. Suffiſe à tant des malles conditions de ce traicté de Flateur méſonger. Prenons aucunes doctrines ou conſideratiōs contre luy, & pour Prudence.

*La premiere conſideration.*

**C**Hacū ſeigneur ſe doit mōſtrer tel en faiēt & en paroles qu'on luy oſe & vueille dire verité, ſoit à ſa louange, ſoit à ſon blaſme, ſoit à part ou en publicq'. C'eſt l'enſeignement de ſainct Loïs à ſon fils. Autrement ſi vn ſeigneur dit, *Loquimini nobis placentia*: Dictes nous choſes qui plaiſent, ou ſ'il hait ceux qui dient verité, comme Achab dit de Micheas, Je l'ay en haine: car touſiours il n'apporte que mal, certes c'eſt fait de vn tel ſeigneur: il eſt perdu en corps & en ame, & renommee: pourquoy? pource que le Sage dit, *Princeps qui libeter audit verba mendacij, omnes ministros habet impios*: Le ſeigneur qui oyt volontiers méſonges, a tous ſes miniſtres & ſeruiteurs mauuais, & plaïs d'iniquité. Car ſoit droit, ſoit tort, touſiours diēt, mōſieur dit bien, mōſieur fait bien, il a droit:

## Harengue au Roy

Par ainsi se perd toute liberté de franchemēt parler & conseiller. Toutefois Caton le grand enseigne la principale cause de l'exaltation des Romains. *Erat amicus in consulendo liber*. Pource disoit il, que chacun estoit en son franc arbitre pour dire & conseiller la verité. Le seigneur au fort a tel cōseil cōme il veut: ainsi n'est pas excusé si mal en viēt

### *La deuxiesme consideration.*

**L**E seigneur doibt non pas demander conseil seulement, mais le croire, & l'executer, & tenir secret: car autrement ne se sembleroit q̄ mocquerie, ou maniere d'une contenance, demāder le conseil & en rien faire. A l'exemple de Achab, qui à l'exhortation de Iosaphat demanda le conseil de Micheas, & le coniura deux fois ou trois par serment qu'il ne luy dist que verité. Micheas luy reuela la vision de Dieu. Lors Achab se courrouça, & commanda qu'il fust mis en prison, & soustenu de pain de douleur & d'eau d'angoisse, toute l'histoire est proufitable à nostre propos. au tiers liure des Rois au dernier chapitre. Ainsi vn poure à ce que dit Terence: c'est à sçauoir que nature est telle que nous voions plus cler en aultruy fait, que au nostre. Trop legierement est chacun aueuglé en son faict, ou par ire, ou par haine, ou par propre affection: plus aussi voient plusieurs yeux qu'un. Qu'est ce du sens d'un homme seul? Pource dit & commande le Sage: Fay tout par conseil, & iamais ne t'en repentiras. Assuerus comme nous

lisons en Hester, auoit tousiours sept sages à l'exé-  
ple des sept sages predecesseurs des Rommains,  
par le conseil desquels il faisoit tout. A ce se rap-  
porte ce que dit Homere du conseil qui gouuerne  
ce monde bas, voire par le conseil des douze si-  
gnes. Saluste dit qu'on doibt longuemēt conseil-  
ler & tost executer. Car de ceux qui ne croient cō-  
seil, dit le prouerbe, On ne doibt point conseiller  
beste, qui son conseil porte en sa teste: pourquoy?  
pource q̄ tout le mal chet & redōde sur les cōseil-  
lers selon l'estimation & iugement des gens. Car  
quelque chose qu'ilz cōseillent bien & verité, tous-  
iours dit on: c'est le mauuais conseil qu'on luy bail-  
le qui fait tout. Mais qu'est ce qui empesche sou-  
uent l'executiō des bons conseilz? C'est mō Dieu,  
pource qu'ilz ne sont point tenus secrets. Vne fois  
me fut dit par vn seigneur en plaine table ou seoit  
mon sieur de Bourgongne, que depuis que les con-  
seillers festoient bien acquitez es conseilz, ie ne  
sçay quels varlets & quels gens de neant au soir  
& au matin destruisoient tout. Et comment pour-  
roit on cecy faire si conseils estoient secretz? Se-  
cret est plus fort & meilleur remede contre tou-  
tes aduersitez de la chose publicque, comme dit  
Valerius Maximus *libro secundo, capite primo*. En re-  
citant que le Roy de Perse s'estoit rebellé contre  
les Rommains, lequel fut plustost rendu & vaincu  
en bataille, que les Rommains estans hors du senat  
sceussent comment sa rebellion auoit esté denon-  
cee. De ce vint l'ordonnance que les enfans n'en-  
traissent point es conseilz, excepté Papirius qui les



## Harengue au Roy

sceut bié dissimuler & celer à sa mere. Je laisse l'histoire. Quintus Fabius Maximus disoit, que si sa chemise scauoit son secret contre Hannibal, il la getteroit dehors. Et Dieu scait, si les conseilz de France vont à la monstarde, & se chantent à la vielle, tant sont secrets.

### *La troiesme consideration.*

**T**Els doiuent estre appelez es cōseilz qui dou-  
tent Dieu & consciēce, & qui mettent le bié  
commun deuant leur propre proufit: car au-  
trement ne diront verité plainement sans  
crainte, ou sans faueur, ils n'alleguerōt ia bié au vif  
les meschefz & oppressions du peuple, ou choses  
qui puissent desplaire, mais ployerōt les espaules,  
& se tairōt ou ne dirōt chose qui vaille. Certes ce  
sont folz, ausquelz ne chault d'ou viennent les biés  
mais qu'ils en ayent: gens aussi presumptueux par  
folie ou ieunesse, ne donneront ia constāment bō  
cōseil. Qui n'a foy à Dieu son souuerain seigneur  
& à soy mesmes, comme la gardera il à autrui? *Qui  
sibi nequam cui bonus?* Exemple, notez *In historia tri-  
partita*, cōment Cōstantin esprouua ses bons amis:  
Il fist crier, que tous ceux qui voudroient renier la  
loy & foy Crestienne seroiēt ses bons amis, & p-  
chains conseilz: les autres s'en partiroient tan-  
tost. Plusieurs renierent la loy: aucuns s'en parti-  
rent en la gardant. Constantin mua sa sentence: il  
retint les loyaux à Dieu en disant, Si vous ne gar-  
dez foy à vostre Dieu, quelle esperance doy ie a-



uoir, que loyauté vous me faciez? Iouxe ceste consideration il sembleroit tresexpedient que des principales parties du Royaume fussent aucuns appelez & ouiz, tant nobles que clerks, pour exposer franchement le miserable estat de leur pais: car trop mieux le scauent par veue d'œil, & par experience que ne font ceux qui sont tant aises en leurs hostels à Paris, ou est toute la greffe du Royaume, & ou la vie se retraict au cueur. Plus meurent choses veues & congneues, que seulement ouyes. Si doit aussi la fille du Roy en ce cas estre bien ouye & creue. Car les parés de tant d'escoliers qui viennent de toutes parts, & consequemment, les escoliers s'en sentent bien tous, comme vous pouuez scauoir. Vray est aussi que la voix de flaterie ne deuroit pas estre alleguee par les conseillers en ce Royaume. Quelle voix? c'est qu'il suffist estre confesseur, sans vouloir estre martyr. O flateur qui ainsi dis, fache que les seigneurs du Royaume de France ne sont pas tels tyrans, que ils facent les gens martirs pour dire verité, & si ne es pas digne de l'estre. L'archeuesque de Rheims qui me donna couronne fist iadis telle responce à vn seigneur de France. Ainsi ne sont de riens excusez conseillers, qui faignent à dire verité quand lieu & temps en est.

*La quatriesme consideration.*

**B**onne prudence requiert, que accusatiōs secretes, faictes par flateurs, ou pour nuire à aultruy, ou pour faire le bon varlet,

## Harengue au Roy

ou le bon amy du seigneur : ou pour follement luy complaire soient tantost reboutez , ce qui est le plus seur : ou ne soient de riens creuz sans ouir partie. Dure chose est, ce dit saint Bernard, qui de son temps ne congnoissoit grand seigneur qui ne fust maculé de ceste tache: laquelle neaumoins engendre tous maux . Dauid qui estoit tant bon & sage fut deceu par la faulse relation de Ciba cōtre sō maistre Miphiboseth. *ij. Regum xvi. & xx.* I'ay esté en court, & sçay que par telles occasions il est en la puissance d'aucunes gens de neant mettre en indignation du seigneur les meilleurs amis qu'il ait sans y sçauoir trouuer nul remede: car indignation celee, ne peut estre excusée ne sauuee. Or est il ainsi qu'en aucuns cas iamais ne se reueleroit par le seigneur telle accusation: ie metais de la cause. Ceste consideration a lieu en matiere de foy & de bonne doctrine, que iamais ne soit creu homme tant semble grand clerc ou preud'homme, sil ne ose dire en publicq' ce qu'il dit en tenebres, ou en maniere de secret, & aucunes fois en maniere de resuerie ou ionglerie, cōme en heraudant, & en moquant. Foy n'a point de ieu, & verité aime lumiere & veut bien estre examinée, & sur toutes choses chacun Roy ou prince Chrestien doit escheuer que par telles informations, ou autrement il ne trebusche en aucuns erreurs contre nostre foy & saine doctrine pour foy iustifier en ses faicts, ou autrement, quelque pecheur qu'il soit par humaine fragilité. Car n'est peché qui tant redist vn Roy ou vn prince desplaisant à Dieu & diffame au mō-

de,iusques à le persecuter par le feu ou par espees selon les loix diuines & ecclesiastiques. Si par celle consideration, prudence est bien gardee es cōseillers contre flateurs mēsongers:c'est grand aide pour la conseruation du Roy& de la vie ciuile,car Roy sans prudent conseil, est comme le chef en vn corps sans yeux,sans oreilles & sans nez.

*Du delict voluptueux, qui est contre la seconde vertu,  
c'est à scauoir Force.*

**O**R fault avec la prudence des conseillers q̄ Force soit & constance es cheualiers pour executer ce qui est deliberé par prudence, autrement le Roy est cōme vn corps sans le cueur & sans les bras. Mais helas delict voluptueux soudoyer maudit de peché, le vilain tiran qui coupe la gorge en baisant,& meurtrit en embrassant,& empoisonne en abbreuuant comme le trahistre Ioab:trauaille trop ceste belle vertu, en impugnant cheualerie. Car n'est si fort, si constant, si leger, si vertueux champion que delict n'affolle & gaste se il s'abandonne. C'est la fontaine Salmacis en laquelle selon la fiction des poetes chacun homme qui s'y baigne est faict moitié femme ou Hermofrodit. C'est le retz des subtils filetz de fer, que fist Vulcan pour ensacer & prendre Mars avec Venus à sa grande irrision. C'est forme avec delict. Et par qui fut destruite Troye la grande: par le delict voluptueux qu'il print en Heleine. Par qui perdit Tarquinius& toute sa lignee, la seigneurie de Rō.



## Harengue au Roy

me? par le delict voluptueux qu'il eut en Lucreſſe. La lignee de Benjamin, par qui fut elle preſque toute deſtruiſte? par delict voluptueux. Hannibal, Antoine, Alexandre, Sanſon, Dauid, & autres treſuiſtorieux cheualiers, incontinent que le delict voluptueux, oyſeux & pareſſeux les embrasſa, perdirent tout cuer & toute force: mais auſſi toute dame tant ſoit haultement honnoree, en pert ſouuent ſon eſtat & ſa vie. Semiramis, Cleopatra, Roſemond, Medee, Brunchilde iadis Royne de France, & autres dames ſans nombre ſont en exemple. Iadis vn prince de Romme Attilius, ouit dire qu'en Athenes aucuns Philoſophes bailloient ceſte doctrine, qu'o deuoit tout faire pour delict voluptueux: Il ſen donna merueilles, & ſouhaitta ceſte doctrine à tous les aduerſaires des Rômainſ. Pourquoy? pource qu'il ſcauoit bien que tantost ils deuiendroient foibles, aneantis & treſlegers à ſurmôter. Mais delict voluptueux pour plus attirer & deceuoir, fait tellement qu'il vient ſoubs vmbre de bien en tapinage, tellemēt qu'on n'en ſcaura rien. Pour Dieu ſeigneurs & gentilzhommes ne vous y fiez point. Dit Iuuenal, qu'il n'eſt riē qui puiſſe eſtre ſecret en vn riche hōme. *Secretū diuitis nullū eſſe putes,* &c. Incōtinēt tout eſt ſceu, tout eſt ſonné, tout eſt plain. Exemple de Midas: duquel ſon varlet ne peult celer qu'il auoit oreilles d'aſne. Experience monſtre que ſeruiteurs dient tantost ce qu'on leur demande du ſeigneur: voire auant qu'on leur demande, poſé auſſi qu'on ne le vouliſt point ouir. C'eſt leur malle condition de voluntiers meſdire:



c'est ce parquoy ils veulent sembler estre bié prochains du seigneur. Si font souuēt les seruiteurs cōe les chiens d'Acteō qui derōpirent & rongerēt leur propre maistre. Aussi d'un hōme mauuais en haut esleué, n'est autre chose fors vn hōme eschafaudé & mitré: tant plus est cōgneu, tant plus est mōstré au doigt, & mocqué de chacun, & doiuent incon- tinēt à l'exemple de Sardanapalus, qui pour telles voluptez en perdit son Royaume par l'enuie de sō preuost, qui l'auoit veu cōuerser trop molemēt entre les femmes. Pour tāt dit Arist. en baillāt les cau- telles avn tiran pour continuer son faict, quil ne se doit point abandoner à delict & à volupté: car au- trement on ne tiédroit tantost cōpte de luy. Trop plus s'en doit garder vn naturel seigneur. Si pren- drons aucunes considerations cōtre delict oyseux pour conseruer force & constance es gens de che- ualerie en parlant aucunemēt comme vn clerc des armes, par lire ou ouir plus que par experience.

*Premiere consideration.*

**S**Oiēt les nobles exercitez & instruiz des leur ieunesse à peine & à labeur & es faictz d'ar- mes, tāt par experience cōe par sciēce de cro- niques, & histoires, & faictz anciens. Si ie- nesse est souef nourrie, que fera elle en vieillesse? Main tendre tient mal l'espee, & chef bien peigné porte mal bacinet. Saul, Gedeon, Daud, Titus, Alexandre, & autres preux & vaillants eurent ieunesse treflaborieuse, à fin que par ce fussent apres plus exercitez & vaillans en faictz d'armes.

## Harengue au Roy

A quoy est tresproufitable accoustumance de ieunesse, en tant que pour telle exercitation en labours, aduient que gens ruraux & de villages ou bergers sont quelques foiz plus vigoureux en bataille que plusieurs nobles. Et pource aduenoit es Romains, que de la charrue ilz appelloient aucuns pour estre leurs Empereurs & bien leur en venoit. De ce parle Vegece & Valere: parquoy appert que telles gens ne sont pas du tout à rebouter es beaux faicts de bataille, & que ieunesse des nobles ne doit point estre oyseuse ou delicieuse. Mais aussi par bonne instruction es faicts des anciens, si engédrerà hardiesse: car on fait trop plus legèrement ce qu'on sçait auoir bien apprins. Nous sçauons que par vn stratageme, c'est à dire par vne cautelle de bataille, comme pour vn sophisme en logique, ou vne embusche, ou aucune ordonnâce solutiue: desquelles parle Frontinus en son liure, & Valere aussi en vn de ses chapitres. Dix hommes d'armes en vainquirent cent, & cent vainquirent mil. Je laisse les histoires de Epaminondas contre Perses & autres, pource disoit Scipion African: que ce n'est point sens d'entreprendre bataille, qui ne se sent tellement ordonné qu'il n'ait l'auantage sur ses ennemis, ou se neccsité ne cōtraint à soy defendre presentement. Icy sont à reprendre ceux qui mesprisent que nobles enfans aprennent es liures, ou par les clerks les histoires & croniques des batailles, il semble qu'il n'est seigneur qui ne doive auoir pour soy & ses enfans le liure du regimedes des princes ou semblables.

**E**N l'estat de cheualerie soit gardee frugalité en toutes choses: c'est à dire mesure en vins, viandes & vestures, qui pourroient tourner le corps & courage à lascheté & paresse, & à delict voluptueux qui l'emplist de vins & de viandes: tellement qu'il chancelle ou trebusche en la boue, comment sera il ferme contre coups de lance, esueillé au doux son d'une chanson ou d'un cri non? que sera il au bruit horrible de la trompette? Si la robbe traîne deux pieds par terre, & les manches sont larges à dextre & à fenestre: & les poulaines de demi pied de long: que proufirera tout ce cy pour poursuiure vigoureusement ses ennemis? Disoit Marius que telles menues nectetez & superfluites appartiennent aux dames & damoiselles: mais le poix, charge, & labeur aux hommes. Augustus, Charlemaigne, Caton, Fabricius, & plusieurs autres preux ont esté tressobres, tant à l'hostel comme es guerres, en tant qu'aucuns d'eux ne mangeoient, fors en allant & venant le pain en leur main. Ils ne se seioient par trois heures à la table & à dresseur paré. Un Prince de Romme nommé Metellus, quand voulut aller contre Iugurta, chassa hors de son host les porteurs d'eau: & defendit qu'on ne vendist rien cuit, & commanda que chacun cheualier fust sans varlet & sans cheual, & portast sa viande & ses armures, & clost son host de fossez comme si Iugurta fust present, pourquoy ilz furent victorieux. Ils ne trainoient pas apres



## Harengue au Roy

eux trois ou quatre chariots de robes, ioyaux, tapis. chausses femelees, double ciel à tédre, & choses sèblables. On ne portoit point apres eux fourneaux d'arain, ou de fer, pour faire petits pastez. Telle charge ne vault rien, fors pour empescher. Celerité ou hastiueré, est le souuerain auantage à surprendre ses ennemis, sans ce qu'ils s'en contregardent. *Ibimus ad securos.* Iules Cæsar, & le bon Cōnestable Guesclin gaignerent tout par ceste celerité. Mais vn host qui porte sa charge & ses bagues comme vne lymace ou tortue, comment se hasteroit?

### *La troiesme consideration.*

EN l'estat de cheualerie soit sur toutes choses discipline gardee: i'entens par discipline obeissance au prince, au capitaine, sans ce que chacun vueille ensuyure son propre plaisir ou delict voluptueux. Saluste s'équiert pour quoy les Rommains ont conquis la monarchie du monde par force. Car les François ont esté, se dit on plus cheualeux & fors par sagesse: les Grecs les ont en ce passez par richesse. Les Rommains furent trespauures plus qu'autres. Ce leur a donné la discipline militaire: voire telle discipline, que plus souuent estoit puny celuy qui ne obeissoit à son capitaine, que celuy qui se tournoit aux ennemis. Postumus Torquatus occit son propre fils: pource que contre son edict, il auoit prins le combat seul à seul à vn François. Combien que



il l'en eust surmonté. Semblablement vn autre comme Posthumus le fist de son fils. Ne voulut pas occire son propre fils & seul heritier Ionathas, pource que contre son commandement lequel il n'auoit pas entendu, il goustâ vn peu de miel? Ie me doubte, que trop autrement ne soit discipline gardee, mais gastee es François. Clerus Duc des Lacedemoniens commandoit à ses gens allans en bataille, Doubtez plus vostre capitaine que voz ennemis. Or à vray dire, vn host sans obedience, tant soient plusieurs, n'est qu'une foule de gens abandonnez à mourir & toute occision, côme brebis sans ordre & sans pasteur.

*La quatriesme consideration.*

Pour oster toute occasion en estat de cheualerie, de se ioindre à delict voluptueux, gens d'armes & souldoyers doiuent bien estre payez, pour bien payer ce qu'ils prennent. C'est le commandement de saint Ian Baptiste, *Contenti estote stipendiis & neminem concusseritis*, Si payement faut aux gens d'armes, ils s'excuseront de payer, se ils ne payét, ils pillerôt & roberôt sur les pauvres gens tresoutrageusement, d'aultruy cuir large courroye, puis les assaür delict voluptueux. Apres que s'ensuit il au pauvre peuple? il s'en conuiét fuir deuant eux, comme brebis sont deuant les loups: & ne vouldroit il pas donc mieux au pauvre peuple estre sans deffence, que tels protecteurs, ou tels pillars auoir? vrayement il n'est langue qui suffit

## Harengue au Roy

à descire la tresmiserable indignité de ceste besongne. Le vous supply que vostre tresnoble, trespiteux & tresbening courage parface en misericorde & cōpasion, ce que ie ne pourroye iamais exposer par quelque parolle ou lamentation. Las vn poure homme aura il payé son imposition, sa taille, sa gabelle, son fouage, son quatriesme, les esprès du Roy, la saincture de la Roynes, les truages, les chaucees, les passages: peu luy demeure: puis viendra encores vne taille qui sera creee, & sergès de venir & de engager ports & poilles. Le pauvre homme naura pain à manger, sinon par aduenture aucun peu de seigle ou d'orge, la pauvre femme gerra, & auront quatre ou six petis enfans au foyer, ou au four, qui par aduenture sera chauld, demanderont du pain, crieront à la rage de faim. La pauvre mere si n'aura que bouter es dens que vn peu de pain ou il y ait du sel. Or deuroit bien suffire ceste misere: viendront ces paillars qui chergeront tout: ils trouueront par aduenture vne poule avec quatre poussins, que la pauvre femme nourrissoit pour vendre & payer le demeurant de sa taille, ou vne de nouuel creee, tout sera prins & happé & querez qui paye. Et se l'homme ou la femme en parlent, ils seront vilennéz, rançonnez & garçonnez, se ils veulent poursuiure le payement ils perdront leurs iournees, ils despendront au double, & finablement n'en auront rien: fors par aduenture vne cedula chantant que on doit à tel tant, voire dit l'autre, & deura. Que vous semble il que peult auoir pis le pauvre bon homme? peult auoir  
pis

pis. Certes encore est le plus grief, l'entrebattont gens d'armes, qui ne sont point contens de rien prendre ou rien n'a, mais menassent de paroles, & battront de faict l'homme & la femme: ou bouteront le feu en l'hostel s'ils ne rançōnent, & font finances à tort & à trauers, d'argent, ou de vins & viures: ie me tais des efforcemens des femmes veues & autres. Ce par aduenture semble petite chose, pource que ie ne parle que d'un hōme. Croyez Messieurs tout de certain, comme la mort, que il en y a mil & mil, & plus de dix mil par le Royaume pis demenez que ie n'ay dit. Treshaults & trefexcellens seigneurs, à ces paroles vostre cueur tant bening se tourne à compassion, ie n'en doute point, & à bon droit. He Dieu, & que seroit ce si vous voyez les horribles & tresproues faictz ain si faire à l'œil cōme ils se font? N'est point à croire q̃ vous ne pourueussiez treshatiuemēt de remede auant que vous dormissiez de ferme somme en liēt. Voz nobles personnes ne font pas, ou commandent telz oultraiges, on le sçait bien: mais il ne suffist, pas n'estes excusez enuers Dieu & raison: pardonnez moy si ie parle franchement. Il ne suffist pas, dis ie, si vous ne les empeschez realement, & de faict. Aucuns dient bien à leurs varlets, quand on se plaint d'eux, N'emportez rien: mais en bas, ou à part, ou en autre langage dient, Point point, allez, prenez tousiours. Làs quelle chose est seruitude es subiects quelconques, se c'est icy franchise? ou est ce beau tiltre de Roy, *Francorum Rex*? Le Roy des François. Trop est perdu, ce me semble en plu.



## Harengue au Roy

seurs de ce Royaume. On parle d'aucuns pais gou-  
uernez par tyrans, qui trauaillent en plumât leurs  
subiects: mais le demeurant est seur & bien gardé,  
tellement qu'il n'est homme qui oſast raurir vn  
seul pouſſin, ou geline sur la hart. Et n'est ce pas  
choſe plus intolérable aux subiects que quand rié  
n'est seur, ne en corps, ne en meubles, ne en con-  
ſcience: car le paoureux ſoucy, langoiſſeuſe double  
continuelle d'estre pillez par princes, ou par gés  
d'armes, leur fait tresgriefz, tresimpatiens, & dou-  
loureux tourmés: tant que de noſtre tēps pluſieurs  
ſont cheuz en deſeſpoir, & ſe ſōt occis. Dieuquelle  
horreur! ils ſe ſont occis, l'un par pēdre, l'autre par  
noyer, l'autre par ferir d'un couſteau au cuer. Là!  
q̄ pourront reſpondre au deſtoir du iugement de  
Dieu, ceux qui ont donné cauſe de telle perdition  
de Chreſtiens en corps, & que pis vaut, en ame: ſi  
Dieu ne les a prins à mercy, ſi Dieu ne fera point  
de miſericorde à ceux qui ne l'auront point faiſte:  
quelle rigueur monſtrera il à ceux qui aurōt ceſte  
cruauté procuree? Toy Prince, tu ne fais pas telz  
maux, il eſt vray: mais tu les ſouffres, aduiſe ſi Dieu  
iugera iuſtement contre toy, en diſant: ie ne te pu-  
nis pas, mais ſi les diables d'enfer te tourmētent, ie  
ne les empescheray point: c'eſtoit mal pour toy.  
Et n'est ce pas merueilles commēt gens qui n'ont  
rié de foy, de loy & de conſciēce ne pēſent quelle  
abſolution pourrōt receuoir, ou quelle ſatisfactiō  
faire es cas deſſusdicts. N'est ſi ſage confeſſeur qui  
ſouuēt y ſache trouuer tour ou iſſue, Dieu y pour-  
uoie. *Nō dimittitur peccatum: niſi reſtituatur ablatum.*



Il conuient rendre ou pendre. Samuel le mōstroit biē de faiēt & de paroles. Icy se fōde & prêt deux de ses requestes faiētes l'vne pour la conseruation dudomaīe du Roy, & l'autre pour la iustice du Roy aume defendre cōtre ses ennemis. Si le Roy a patures & peu de subieēts, que vaudra son domaine? ou subieēts ne sont, seigneurie fault, & subieēts fail lent s'ils n'ont que viure *Prouerbior. ix. In multitudine populi dignitas regis.* dit le Sage: q̄ la dignité du Roy est en la quantité de son peuple. Quant mesnages se sont partis du Royaume par tels outrages: quātes mortalitez en sont venues sur enfans, hommes & bestes par defaulte de nourriture, ou par malle nourriture: les labourages se laissent à faire, c'est pitié de le sçauoir: car ils n'ont de quoy semer, ou ne osent tenir cheuaux ne bœufs pour doubte des pries, ou des gēs d'armes, ou n'ont courage de labourer, pource que rien ne leur demeure. Et leurs enfans par lesquels les anciens peres deuroient estre aidez, incontinent s'en'partent, nous aymons mieux, dient ils, faire le gallin gallant, que labourer sans rien auoir: ainsi fault aucunes fois que les bonnes gens froisse de vieillesse, tirent à la charrue quand ils deussent auoir repos. Et quoy oultre, les vaillans nobles bien rentez, ne peuvent estre payez de leurs hommes & rentiers, ou rien n'a, le Roy perd son droit, ceux de l'Eglise le sentent toutefois tresbien. Les pauvres mendians crient à la rage de faim: pource que rien on ne leur donne. On voit cecy à l'œil, en quelque estat que ce soit, par telles choses les edifi-

## Harengue au Roy

ces royaux, & de la chose publique, chasteaux, ponts, chauffees, moulins du tout se perdent. Et quant au faict de la guerre, iugez par ce qui est dict: comme les loyaux subiects sont plus greuez par gens d'armes, que par les ennemis du Royaume. Dieu par sa grace y vueille mettre remede breuement, par le moyen de vous tresnobles & excellens seigneurs: à fin que le Roy viue de vie ciuile & politique, *Vivat Rex.*

*De barat rapineux, qui est contre la tierce vertu,  
c'est à scauoir Iustice.*

**D**Eclarons cy apres, la desloyale entreprinse de barat rapineux: c'est bien expedient, luy est ce, qui le permettroit: attendu qu'il subuertit & chasse la belle tierce vertu, Iustice: plus belle & merueilleuse, selon le dict d'Aristote, *iiij. Ethicorum*. que n'est la clarté de l'estoille journal, & sans laquelle, dit saint Augustin, *iiij. de Ciuitate Dei*, Les Royaumes ne sont fors que de larcins. Appliquer ce peut à ce l'histoire de Diomedes, larron sus mer: auquel Alexandre demadant, pourquoy il pilloit ceux qui passoient la mer, respondit, Mais pourquoy pilles tu tout le monde? on m'appelle larron, pource que ien'ay qu'une petite nasselle: & toy qui as grand circuit en despoilles, es nommé Empereur. Telle consideration eut la bonne femme qui dist, que les grans larrons mennoient les petits pendre. Icy se prent le point de la reformation de Iustice en ce Royaume: car par

default de Iustice, comme dit le Sage, vn Royaume est transporté d'une gent & d'une lignee en l'autre. *Regnum de gente in gentem transfertur propter iniustitias, &c.* Il n'est mal, qui ne s'en fourde. Si prendrons quatre considerations contre barat rapineux.

*La premiere consideration.*

Comme Iustice ne doit point estre vëdue, ainsi ne doibuent les officiers de Iustice estre instituez par prix, ou par argent, ou violence de priees armees: mais par preud'hömie, & suffisance. Comment ne vendroit Iustice, celuy qui tant cher l'a acheptee? il la vendra croyez moy, & se gardera d'y perdre, n'est cautelle, ou malice qui ne trouuast, auant il fera les droicts au poix, & iugera coup d'un, coup d'autre: & le plus pesant de la balance l'emportera: on ne pourroit en vn iour, non pas en six mois, reciter le trauail oultrageux, qui pour ceste cause vient sur les pauvres gens par pertes de iournees, par deffaux de cötrouues, par amendes, par procureurs, aduocats, promoteurs, par violence & extorsion de sermés. O quel trebuchement d'ames, & quel enlachement viendront à l'hostel, rien ny sera qui ne soit réuersé deux ou trois fois le iour, iusques à tant que on ayt composé: ce qui est contre l'ordonnance de Dieu en la loy ancienne, qui ne vouloit point que l'homme entraist dedäs l'hostel de son voisin pour prédre son gage, & veoir sa pauureté. Ainçois deuoit attendre à l'huys: aussi il aduient souuent que

## Harengue au Roy

les despens surmontent le principal : mais seront excusez ceux qui instituēt tels officiers desloyaux, aigres & sçachans? certes non. Dieu en sa loy & les bons anciens seigneurs vouloient bien que autrement Iustice se gardast. Le Roy Cambises auoit vn preuost qui iugea mal, il le fist escorcher & mettre la peau au siege de Iustice, & assist son fils au siege pour auoir souuenance qu'il ne faulst Iustice, cōtre tels parle le Sage, *Sapientia sexto, Cū essetis ministri regni illius non rectē iudicastis, neque custodistis legē iustitiæ, neque secundum voluntatem Dei ambulastis: horrendū & citō apparebit vobis, &c. & Ezechielis tricesimo quarto, & alibi pluries.*

### *La deuxiesme consideration.*

**C**omme misericorde doibt estre faicte aux humbles subiects, pareillement doibt estre iustice & punition contre les peruers, à fin que par eux les bons ne soient trauaillez & gastez. C'est le mot de Virgile louant des Romains, *Parcere subiectis & debellare superbos, Eneidos sexto.* Disoit Caton que la chose publique ne peult bien aller, quand il n'y a difference entre les bons & les mauuais, *Inter bonos & malos discrimen nullū.* Les ennemis familiers nuisent plus que les estrangers, aussi sont plus à extirper. N'auons nous pas de plusieurs princcs, qui pour garder leurs loix cōtre les malfaiçteurs ont faict iustice contre eux & leurs enfans? Charundas auoit faict loy, que on ne entraist pas au marché à tout l'espee sur peine de mort. Long temps apres il venoit de dehors, & a-



uoit son espee ceincte, entra au marché sans aduer  
rance, on luy ramenteur sa loy, ie la tiendray, dist  
il, & ranoft se tua. Zeleucus auoit vn seul fils qui  
auoit desserui à perdre les deux yeux, on vouloit  
quitter l'amende, il iugea que son fils perdrait vn  
œil & luy l'autre. Vn Euesque d'Angleterre estoit  
reuestu pour chanter messe, on luy denonça le for  
fait de l'un de ses subiects, il attendit à celebrer  
iusques à tant qu'il fist iustice. Comment ie doy,  
dist il, iustice à Dieu & parautant ie la paieray. Vn  
Comte estant au lit de la mort, ouit dire que son  
fils auoit violé vne pucelle, il l'appella & le tua: le  
prestre luy en voulut faire faire conscience, quād  
il deur receuoir le saint sacrement, il respondit  
qu'il n'auoit pas tué son fils: mais son forfait, &  
gardé la loy de Iustice. J'ay oui parler d'un Comte,  
lequel iagoit qu'il fust de tresmauuaise vie, il punif  
soit aigrement les maux de ses subiects, & quand  
on luy demandoit comment il punissoit en autrui  
ce qu'il faisoit, il me suffist, disoit il, estre dampné  
pour mes meffaits, sans l'estre pour ceux d'autrui.  
Celuy qui ne garde les forfaits de mal faire,  
quand il peut: n'est il pas coupable des maux qu'ils  
fôt en ap's? ceres ouy. On demāda à vn Roy de Frā  
ce remisiō pour vn qui auoit tué vn autre, le Roy  
dist, qu'une autrefois luy auoit pardonné le cas pa  
reil, & que ce cas ne luy seroit point pdōné: pour  
quoy dea? dist vn fol qui estoit present, vrayemēt  
sire vous luy deuez bien pardonner: car vous auez  
fait ce meurdre. Va fol tu ne sçais que tu dis, luy  
respondit le Roy: & dea, comment l'auroy ie fait?

## Harengue au Roy

Je le vous diray Sire. Si autrefois vous eussiez fait iustice du meurdre premier, il n'eust pas maintenant tué vn autre. Ce mot fut sage mot, dict d'un fol, encore qu'il eust esté vn des sept sages, & preuue ce mot nostre consideration.

### *La troisieme consideration.*

**O**fficiers de Iustice ou autres, ne se doiuent multiplier, ne trop souuent chāger: raison, quand officiers se multiplient, chacun en emporte sa part en pensions, en dons, en exactions, pour entretenir & mener son estat. Que prouffite au Roy auoir deux cens chāberlans, & autant de varlets de chambre, des secretaires sans nombre, & ainsi des autres? C'est pour honneur, dira aucun, voire mais cest honneur couste tousiours au Roy: vous auez bien ouy de la bonne femme qui veid les estudians à Orleans, & demanda qu'ils faisoient: on luy respondit, ils estudient pour estre iuges, aduocats, & procureurs en nostre pays. Helas, dist la bonne femme: le pays en est ia presque tout gasté: que sera ce de telle multitude? Cecy est quant aux officiers de Iustice: mais quant à ne les changer souuent & de leger, fait ce que recite Aristote es rethoriques de l'hōme, qui estoit nauré & plain de diuerses playes, pour le sang estoit tout couuert de mouches, vn en eut pitié, & luy osta les mouches: il s'en plaignit, en disant, q̄ les nouuelles viendroient toutes affamees, qui le succeroient plus & greueroient que les autres. Ce

est vn mauuais mors de mouche maigre. Vray est, qu'un Empereur nourrissoit & entretenoit ses officiers, pour en vser comme d'une esponge : il leur ostoit tout ce qu'ils auoient amassé par les espraindre en prison ou autrement.

*La quatriesme consideration.*

**S**Oit honnoree la court souueraine de Iustice, tellemēt que ses sentēces ou arrests soiēt gardez sans enfreindre, autrement route Iustice ailleurs ploiroit, trébleroit, & trebucheroit: autrement la principale garde de la vie ciuile du Roy periroit: n'est chose qui tant garde la seigneurie Royale en sa vigueur, quelque empeschement personnel que le Roy ait, comme la garde de Iustice, soit present le Roy, soit absent. Et si au faict de la deffēce du Royaume pouuoit estre instituee vne telle certainté & loy permanable, pour tantost obuier aux ennemis, la vie ciuile du Roy, du tout en tout seroit permanable, en quelque point que fust la vie corporele. Et pleust à Dieu que cecy fust bien aduisé, pensé, & ordonné: mais c'est chose trop forte & ardue: neanmoins toutefois telle vie ciuile se garderoit mieux souuent en la main publique du peuple, selon que note Aristote, qu'en la main du seigneur, veu la tresgrande importunité & cautelle ardant des demandeurs, & la liberalité du seigneur qui ne sçait rien esconduire: & quand vient au besoin il ne sçait rien trouuer pour excuse. Dieu vueille au moins que Iustice

## Harengue au Roy

soit gardee sans estre enfreinte pour le grand ne pour le petit: car autremēt se veriferoit le dict de Anataise philosophe, que les loix ou arreſts des iuges ſont à comparer aux toilles des araignes, elles retiennent les petites mouchettes & laiſſent les groſſes aller. Bien ſe portera la vie ciuile du Roy, ſi Prudence eſt es conſeillers, Force es cheualiers, Juſtice es iuſticiers, leſquelles choſes bien gardees & maintenues ſont contre flateur menſonger, deſlicet voluptueux, & barat rapineux.

*De ſtat outrageux, qui eſt contre la quarte vertu,  
c'eſt Attrempance.*

**M**Ais il conuient que la quarte vertu & derniere ſœur germaine aux autres trois, ne ſoit point violee ou hors boutée. Qui eſt ceſte vertu? Attrempance, ſelō ſon nom elle eſt à moderer & garder tout en ſoy meſmes *Nequid nimis*, Nul trop n'eſt bō ſāsmefure, ou tout eſt deſmeſuré, tout trebuche en vne conſuſion. Cōtre ceſte vertu & puiſſance fait tout ſon effort le quart pillart, Eſtat outrageux, pillart eſt il voirement, car n'eſt rien qu'il luy ſuffiſe non plus qu'à vn loup garou tout affamé, n'eſt rien qui le rempliſſe non plus qu'un gouffre de mer, c'eſt vn abifme ſans fonds, ſans riue, c'eſt Eriſtomus du q̄l diēt les fables qu'il ne pouuoit eſtre ſaoullé, c'eſt vn vice deſfiguré, trop hideux, trop eſtrange & mōſtrueux: car d'vnept dōne tout, & par tout ſans meſure reigle ou auis, pour ſatisfaire aux ſāgſues affamees



qui le succét tout, rōgét tout de nuict de iour sans le laisser reposer viure ou durer. D'autre part tout est osté par luy, tout agtappé, taué, happé sans pitié & sans cōpasion tant ayent les autres de pauvreté, il fault tousiours que rapine soit la nourrice de prodigalité, *Qui sua consumunt, &c.* Icy se verifie la malediction du prophete Iohel *cap. i. Residuum eruca comedit locusta, bruchus residuum locustæ comedit, residuum bruchi comedit rubigo.* recitent les poetes de Polyphemus geant qui deuoroit les hommes tous vifz qu'Vlixes auégla, recitent aussi de Busiris le tyran qui les donnoit à ses cheuaux, lequel Hercules tua, de Lycaon qui les sacrifioit à ses dieux, Iupiter le mua en vn loup. Estat outrageux las ne fait il pas telles ou pires cruauitez? ne vit il point du sang & de la chair des pauures gens, quand il les liure à lâgoureuse mort par son outrage maintenir, soit en viande, soit en cheuaux, soit en chiens, soit en presumptueux edifices, soit en famille pompeuse rauissable & honteuse, sans nôbre, sans ordre, sans prouffit, sans mesure, soit en vanitez couuertes sous l'vmbre d'aumosnes ou de religion? C'est merueilleuse & dure sentéce: mais est vraye, ce que dit le sage, *Qui facit eleemosinam de substantia pauperis, &c.* Qui fait aumosne de la substance du pauvre il est comme celuy qui occit le fils deuant son pere. O messeigneurs pensez & considerez que sera ce doncq de ceux qui dissipēt la substāce, nō pas d'un pauvre homme ou de deux: mais de cent hommes voire de mil, en malles œuures, ordes, & villaines pour leur outrage: ie ne scay que i'en diray,

## Harengue au Roy

i'affirme qu'il n'est maison si ferme, chasteau si bien fondé, cité si riche, Royaume si stable, puissant & hōnorable qui ne se gaste, trebuche & perde quand ceste beste mōstrueuse Estat outrageux s'en empare & y demeure. Exemple es Grecs, es Rōmaines, & trop plus q'ie ne voulüsse en estat de Pape & de sa court depuis quarante ou cinquante ans. On doit cōsiderer vn commun prouerbe, ce est, qui plus despend qu'à luy n'affiert, sans coup ferir à mort se fier. Pensez icy ie vous supplie pēsez: tout ce qu'on lieue pour la despenſe du Royaume en subſides, en tailles, en emprunts, & autres ſubuentions, ainſi comme ſi les ennemis estoient eſpandus par tout le Royaume à guerroyer, ne ſuſfiſt point avec tout le domaine pour payer l'estat commun, en la commune despenſe d'aucuns ſeigneurs, chacun le crie, pas n'eſt ſecrer: comment ſe pourroit continuer & maintenir, que en trop tirant tout ne ſe rompe ou deſchire? Si prendrons quatre conſiderations pour Attrempance, contre Estat outrageux.

### *La premiere conſideration.*

**E** Stat doit cōuenablement eſtre ſeparé d'Outrage, premierement es prelates, es grans ſeigneurs: pourquoy? premier pour bon exemple: & pource que ſelon les ſeigneurs le peuple ſe duit. *Mobile mutatur ſemper cum principe vulgus, & qualis rector ciuitatis tales inhabitantes in ea.* On ne veult pas dire que ſeigneurs n'ayent estat eminent &

honorable sur les autres, c'est bien raison : folie est aux moindres & aux subiects, quand ils veulent voler & se comparer à eux, neanmoins il conuient souuent condescendre à leur fragilité. Exemple de Humilité & d'Attrempance, es estats des grands trop pl<sup>e</sup> esmeur que les paroles: voire, me diras tu: mais l'estat de prelature ou de seigneurie, se tourneroit en blasme ou diffame : pour vray non feroit, mais plus honoré, plus prisé & redoubté en seroit, quand on verroit bien que ce seroit par humilité, non pas par escharseté, puis aussi que l'espargne tourneroit au bien & richesse de la chose publique. Et que vault, ie vous prie, tout cest outrage, fors à viure vn seigneur ou prelat tousiours en indigence & pauureté, plus quelquefois que tel qui quiert son pain? Le les appelle en tesmoignage: que volonté ne vault fors qu'à greuer le corps myslig<sup>r</sup> si pesammét qu'il en est pres que tout froissé, & que de la bonne terre de promesse par figure le peuple s'en retourne en Egypte de dure seruitude, tenebreux des pechez, vicieux & de dure oppression contre le commandement de la loy, *Deuteronomy xvij.* ou est commandé que le Roy ne multipliera pas cheuaux & charrois, à fin que ne remeine le peuple en Egypte. Et à vray dire de tout ceste pompe, superfluité & outrage, les seigneurs sont ceux qui ont le moins, & moins leur en demeure. Quantes fois on a veu la personne du Roy, qui ne pouuoit finer d'un escu, ne par priere, ne par emprunt presens ceux ausquels il donnoit souuent par milliers. Le me tais de la vaif-

## Harengue au Roy

selle & autre estat commun. I'ay autresfois comparé l'estat d'aucuns seigneurs à ce qui estoit faict à Belus l'idole & au Dieu de Nabuchodonosor *Danielis ultimo*, les ministres & seruiteurs font entendre que c'est pour eux, & pour leurs despens tout ce qu'on leur apporte, en nom de Dieu il n'en est rien, on fait bien semblant de luy presenter, mais de nuict, c'est à dire en occult, les ministres emportent tout, comme par fosses dessous terre, c'est à dire per cautelles subtiles & occultes, comment? par ie ne sçay quelles descharges tres chargeans & par dōs fardez & coulourez de iustice, tellemēt que cent francs donnez par le Roy à vn de ses seruiteurs, en coustēt quatre ou six cens souuent. Plusieurs icy, ce pense ie ont biē ouy parler, commēt tels sont comme le chien taupin qui happoit tout ce que la mere estant à la table des nopces cuidoit donner par derriere à son enfant, qui est ceste mere fors la chose publique? qui cuide donner merueille à son seigneur, mais le seruiteur *vo* ou autre s'auance & engloute tout: pour Dieu soit dit cōme l'enfant mourant de faim qui escria à sa mere, ma mere ne faictes plus vostre messagier de taupin, car il ne me laisse rien.

### *La deuxiesme consideration.*

**E**Stat tant en clergé, comme en cheualerie & bourgeoisie se deuroit separer d'ouillage par instituer bonnes ordōnances & les garder qu'ils meissent mesure en viandes, en ro



bes, & monture: en vaisselle: en ioyaux: en pierres & telles choses qui nourrissent outrage. Le Roy Philipès iadis par le commun assentemēt des trois estats en fist aucunes qui seroient bonnes à garder & lire parauenture vne fois en plain conseil: au moins donneroient elles aduis & montreroient clerement en quel outrage & presse chacun estat du Royaume est venu & glissé depuis lors en toutes choses. Soit aussi noté le temps passé quand & comment on comptoit en la chambre des cōptes douze deniers ou douze solz, pour la refection des robes de la Royne ou du Daulphin. Et sans aller pl<sup>s</sup> loin, soit ramené en memoire le tēps du Roy Iā que plusieurs ont peu veoir, car par ce que i'en ay ouy dire, tel cheualier est maintenant, ou tel simple Comte qui a plus d'outrage en vaisselle, en rapissierie, en ciels tendus, en vins, en viandes, & en pierreries qu'il n'auoit. Quelle merueille dōc est ce si le Royaume est pauvre & si le peuple ne peult tant d'outrage assouuir. Mais dira cy par aduēture aucun comme fut opposé iadis en cas semblable à Romme, & le recite Valere, comment ne pourray ie faire de ma chose, & de mes richesses à ma franche volonté, en boire, en mēger, en vestir, en aumosner & maisonner? ie respons que non au preiudice des autres membres & de la chose publique, & aussi ce seroit mauuais exēple & seruitude mauuaise non liberté: non felicité: mais infelicité, cōe dit S. Augu. *Nihil infelicius felicitate peccantiū*. Les Princes païēs mesmement ainssi l'ordōnoient cōme Licurgus, cōme Solō, comme les Rōmainsi: il appert

## Harengue au Roy

par leurs loix que ie laisse . Et à vray dire , ie cuide que telle ordonnance finablement plairoit à chacun: car par ce on n'auroit point de honte de soy maintenir sobrement & attrempeement, & c'est tout ce qui engendre & nourrit outrage & faulseré; que honte & vaine gloire, on le voit tous les iours: car en secret il ne chault de tels outrages: les Bourgeois & aultres mariez , s'en sçauent bien à quoy tenir.

### *La troisieme consideration.*

**P** Vis que c'est neccsité en la deffense de la vie ciuile du Roy & du Royaume , prendre & leuer subides, cecy se doit faire en bonne equalité ou equité par tout le corps mystiq'. C'estoit le dict de Platon, selon ce que recite Tulle *iii. de officiis*, que trop charger vne partie plus que l'autre en faisant exaction, est introduire chose pernicieuse en la chose publicque, c'est à sçauoir Sedition. Bien est vray qu'aucuns membres ne labourent point par ouurage mechanicque, ou marchandises, mais ils labourent autrement, comme seigneurs & clerks, à l'exemple du cueur, ou de l'estomach, selon que l'allegua vn Senateur de Rome pour ramener à vnion le peuple avec le Senat contre lequel estoit murmuré, de ce qu'il ne labouroit point ce sembloit . On doit gouuerner tels membres du labour des autres, mais ce doit estre attrempeement & en bõne equalité , sans tout oster à vn coup ou desnuer les membres qui labourent.

rent. Et cōbien que ceste equalité ne se puisse garder à l'ongle ou au point, ie le sçay biē: neaumoīs on en doit faire son deuoir, & que telle enormité euidēte n'y soit trouuee cōe nous auōs touché, & on le veoit des princes & des gens d'armes. Vn pauvre n'aura de son labeur pour toute l'année à nourrir sa femme, ses petis enfans & à payer sa taille & ses aides, que dix ou douze queues de vin, & que deux ou trois muits de blé, tout cecy perira en vne prinse ou en vne venue de gens d'armes. Que fera il? que deuiendra il? c'est grand pitié de le pēser tant seulemēt. Et en tels cas les riches trouuēt plus d'issues & de faueurs que les pauvres. Si vous tous messeigneurs estiez biē alliez ensemble, q'vō<sup>9</sup> seruiroient au cueur du pais de Frāce gens d'armes? Le royaume seroit assez riche pour soustenir vous & voz estats sans du tout abatre l'estat plus bas. Si vous querez estre alliez, & dōnez pource grosses pensions aux estrāgers, n'est pas plus seure, & plus honneste vostre alliance ensemble, soit par liēs de aucūs mariages ou autremēt? Certes ouy: soiēt dōc flateurs mis hors qui troublēt volūtiers tout pour y pescher: mais la pechaille est trop mauuaise.

*La quatriesme consideration.*

**P** Vis que les outrageux font les outrageux estats en plusieurs gēs, on les doit ramener à mesure, & liberalité soit prodigalité, cest à sçauoir, sole largesse, dehors. Le Roy Philippes escrit à son filz Alexādre vne epistre cōtre tels dōs selon que met Tulle *j. de officiis*, *Quod te malū, inquit Rex, in istam spem induxerit, ut eos tibi fideles putares fore*

## Harengue au Roy

*quos pecunia corrupisses? An tu id agis vt Macedones non te regem suum sed ministrum & presbyterum putent?* Dōs outrageux cōe legerement se reçoïuēt, legeremēt & sans proufit se despēdent: tost acquis, tost se despendent. Il appert des acquers des ieux de dez ou par vsure: dōs outrageux pour vn amy font trois ou quatre ou plusieurs ennemis & enuieux, qui se reputēt trop plus dignes de tels dōs receuoir: dōs outrageux & desmesurez descourēt & despouillēt cent & cent pauures gens, voire certes mil & mil, pour couvrir & vestir vn seul hōme, & qui n'a pas cent sols de rente: Dons outrageux rendēt souuēt ceux qui les reçoïuēt pendars, ou pillars quād on cesse à leur donner: Dōs outrageux font les flauteurs & saints amis qui suivent la proye & non le seigneur: qui plus leur donne il les a, de faincte amitié se cōuertissent souuēt en vraie inimitié, on les voit à l'œil: Dons outrageux font esleuer & hōnorer quelquefois gens de neāt, non pas sans vile & orde suspicion, & sans l'indignatiō des preux & vaillans, qui de tous leurs grans reuenus & heritages ne pourroïēt estre tellemēt montez, vestus & equippez comme vn herité de cent deniers tāt seulmēt: Dons outrageux par cedula, ou de bouche sōt tost oētroiez, & semblēt peu de chose ou neāt: mais qui verroit en vn tas mil ou deux mil francs, & la difficulté de les assembler denier à denier du pauvre peuple: tel donne par milliers qui ne donneroit pas par quarterons: neaumoins tout va à la charge du seigneur, c'est le premier payé souuēt. Opposez vous tresnobles & excellēs seigneurs opposez vous par grādvigueur contre ce pillart e-



stat outrageux, & contre les autres trois dessusdits flateur menfonger, delict voluptueux, & barat rapineux, soiez tuteurs, gardes & deffeseurs des quatre belles vertus, Prudence, Force, Iustice, & Attrempance, en la conionction desquelles & bonne proportion se tient & garde la vie du Roy ciuile & politique moiennant les cōsiderations dessus nommees, soit par vostre aide accōpli de faict plus que de parole ce beau cry, *Viuat rex: Viue le Roy.*

*La tierce partie de ceste proposition en laquelle sera parlé de la vie du Roy spirituelle & diuine, laquelle se garde en l'vnion de l'ame avecques Dieu.*

**N**Ostre exhortatiō final & ipetration pour la vie du Roy spirituelle & diuine sera trefbreue, l'heure le requiert ie le sens bien, non pourtāt vostre benignité treschrestienne & religieuse prestera fil vous plaist encoresvn peu voz deuotes oreilles entētiues non pas à moy mais à l'honneur de Dieu & de sa parole à la fille du Roy & pour le Roy, c'est à ce pourquoy ce trefgrand & treshaut conseil se celebre, soit donc vn peu de tēps donné à verité qui souuent se donne long à vanité. En ceste constāce i'ose perseuerer & dire tiercemēt, *Viuat rex: Viue dis ie de vie spirituelle, qui se garde en l'vnion de l'ame avec Dieu icy p grace, & en la fin par gloire, icy p bōne dispositiō, & armonie des dons supernaturelz: en special des trois vertus theologiques, Foy Esperāce & Charité.* l'en cōteray en bref par iiij. cōsiderations pour ceste vie diuine, La premiere consideration pour ce que la bōnne vie spirituelle depend de prospe-

## Harengue au Roy

rité cōuenable de la vie corporele & ciuile. Cest vie spirituele doit estre songneusemēt gardee au Roy & en tous ceux du Royaume. Cōtre qui garderons nous ceste vie spirituele? Contre le prince de tirānie, Peché mortel: c'est le meurdriſsemēt de ceste vie par mauuaises meurs plus nuisāns q̄ malles humeurs. Tenez de certain que pour lespechez du corps myſtiq̄, soit en chef, soit en mēbres nous viennēt aduerſitez corporeles & ciuiles, & par especial quād ce sont pechez horribles, eſtrāges, ors & vilains contre Dieu & nature. Pour ce guerres, pource famines, pource pestilēces, pource ſeditiōs & diuiſiōs nous ſourdēt. Ainſi le dit loy ciuile, ainſi l'aſſerme l'eſcriture ſaincte en mille lieux par dicts & par exēples. Notez les maledictiōs eſcrites *Deut. xxviij. cap.* Et ne fut point par le peché de Dauid, liure à pestilēce son peuple? comme appert *ij. Regum xxvi. cap.* & pour le peché d'Acham fut puny tout le peuple d'Iſrael, *Iofue viij.* Nabuchodonosor pour ce qu'il ne cognoiſſoit pas Dieu, cheut en telle melancolie qu'il cuidoit estre beuf. Parquoy n'eſt pl<sup>us</sup> beau conſeil contre les aduerſitez que nous ſentōs & doubtons, fors labourer & ſ'eſſorcer d'auoir bō ne vie ſpirituele tant au Roy, comme es ſubiects: muons noſtre male vie, Dieu muera noſtre dure ſentence: ſeruons le, & il ſera avec nous: & lors qui ſera ce qui nous pourra greuer? *Nulla nocebit aduerſitas ſi nulla dominetur iniquitas, inquit Gregorius.* Il n'eſt hōme qui ſe ioigne à peché mortel par alliance de conſentemēt qui ne nuise & ſoit traistre à tous les autres: & toute conionction vitale que nous de-

nous auoir & exercer en vn corps ciuil. Si doit vn chacun labourer, à celle fin que son prochain, soit petit ou grand, se porte & face bien: doit aussi chacun empescher le mal, prier pour eux, en especial pour le Roy, & pour les seigneurs. Car en leur bien, est nostre bien, c'est tout à reprendre que de les mauldire: car en ce faisant on maudit soy mesmes & aussi pareillement tout le peuple generally. Par ce bout ce doit commencer la reformation de ce noble Royaume plus qu'autrement en priant pour le Roy, & aussi pour les princes que bõne vie leur vueille Dieu donner: & que deffoubs eux nous ayõs lõgue & paisible vie, selon le commandemẽt de l'Apostre. Les seigneurs d'autre part doiuent mettre toute peine & diligence que les subiects soient bons, doiuent aussi moderer leurs charges & aduersitez à fin que par le glaieu d'impatiẽce ou murmuration ou par baraterie, fauceté & larrecin enfans de peché mortel, ils ne soient meurdris cruelement, car tout recherroit, cõe dit est, au preiudice de la triple vie du Roy & du Royaume. Mais helas que proufite à appaiser Dieu nostre createur de paroles tant seulement, & l'impugner de faict, voire de faict & de paroles p vilains & detestables sermens, par maugrier, despi ter, renier & pariurer, parler contre Dieu, cõtre la foy, & contre la vie de toute bõne personne, à vser des dons de Dieu en son reproche, cõe de force, beaulté, sens & engin, en seruant l'ennemy de nature humaine & guerroyant Dieu le redempteur. telz gẽs sen trouuerõt deceuz, soit tost, soit tard, mais

## Harengue au Roy

fols ne croiēt iufques à ce qu'ils aient receu, il n'eft force ne fens ne confeil en contre Dieu. Il peut en vn moment tout transmuier, & toute l'eftrue des mauuais & leur entreprinfe prefumptueufe en fin ruiner. *Comprehendit sapientes in astutia, & adducit confilia eorum in stultum finem.* Si nous ne mettōs raifon en nous & attendons que Dieu luy mette, ie me doubte qu'il n'y ait vn tel tempefte & tel orage & fur petis & fur grans, que i'ay horreur de le penfer. Dieu par fa faincte grace & misericorde no' doint mieux que nous ne defferuons.

### *La deuxiesme consideration.*

**P**Vis que foy chrestienne est le fondemēt de la vie spirituele, elle doit apparoir fingulièrement au Roy treschrestié tant de parole cōme de faict, & aussi pareillemēt en ses subiects. Dieu en baillāt les conditions du Roy qui dominerait & regnerait sur son peuple, *Deut. xvij.* voulut qu'en especial que tousiours eust deuant foy le liure de la loy pour y lire nuit & iour, & qu'il prīt exēple aux prestres de la loy, & en la nouuelle loy le Roy le iure quand on le sacre, que puiffamment il boutera hors toutes erreurs heresies & malles doctrines, & à bon droit: car saint Remy en baptisant le premier Roy chrestien denonça & pre-dit par l'esprit de prophetie que tant que la foy durast au Roy & au Royaume: le Roy seroit victorieux & son Royaume. Ainsi apert. cōment la fille du Roy doit estre voluntiers ouie en tout ce qui touche la foy & bonne doctrine, comme dame &



maistresse de la loy. Et à l'exéple de monsieur S. Lois, foy est la vertu qui fait humilier le Roy des-  
sous Dieu, en recôgnoissant sa seigneurie souue-  
raine, & que c'est celuy auquel il rendra conte de  
son gouvernement, comme deuant le grand mai-  
stre de la chambre des comptes: parquoy doit il  
estre tel à ses subiects côm'il veut & entend que  
Dieu soit enuers luy doulx, begnin & misericors,  
c'est l'enhorrement du grand S. Antoine aux Em-  
pereurs. Ceste consideration eut Traian quand il  
disoit que tel il vouloit estre à ses subiects comme  
il voudroit que son seigneur fust à luy, *Excelsso excel-  
sior est alter, & iudicium sine misericordia fiet ei qui non  
fecit misericordiam, &c.* Parquoy nous pouuons cle-  
rement veoir en apres que ceux sont tres dange-  
reux, peruers & pernicioeux à toute la vie du Roy  
qui sement malle doctrine contre la sainte foy  
catholique, soit en public, soit en appert, soit en  
espece de ieu ou autrement. Tels gés en bône foy  
deuroiét estre persecutez, extirpez, & adnichilez  
ainsi comme faux monnoieurs, car faux monnoi-  
eurs sont contraires à la vie ciuile, temporelle &  
spirituelle, pourquoy? pource qu'il n'est rien qui  
tienne tant les gens subiects à la chose publique en  
obedience & vnitè dessous le Roy & les princes  
comme foy religieuse. Si sont traistres à Dieu &  
aussi aux seigneurs qui dissipent celien quant en  
eux est, on ne les pourroit trop extirper: & par le  
contraire on ne pourroit trop exaucer & cher te-  
nir la fille du Roy, c'est elle qui garde & nourrit ce-  
ste foy. Et par aduenture si du temps Mahomet

## Harengue au Roy

elle eust esté si grande & si peuplée cōe est maintenant, la grace à Dieu, ceste maudicte secte n'eust pas tant domine. Et n'avez vous pas apperceu depuis ce schisme douloureux qu'après que nul autre pais n'a parlé de le faire cesser sinon à l'esmouue & instâce de l'Vniuersité? Par ces choses apert qu'elle doit estre franche & quitte de tous subsides ou truages, soient dismes ou autres subuentiōs, tant pource qu'elle est fille du Roy de France & noble, cōe pource que singulieremēt elle laboure pour le Royaume & toute l'Eglise, si doit estre plus aidee que chargee. Et c'est vne de ses suplicatiōs laquelle elle a ia plusieurs fois demandee, & vous & noz seigneurs l'avez ottroyee par vostre grād cōseil, cōe raisonnable: cōbien qu'il ne soit encores enteriné par lettres & mādemens expres. Icy on pourroit louer la bōne foy du Roy, & de vous tous noz seigneurs en plusieurs œures religieuses. Ce n'a esté sans vous en ce qu'on a bouté hors les Iuifs & vsuriers, en ce qu'on a deffendu les vilains sermés & les execrables despitemens, reniemens, & maugreemens de Dieu, cōbien que l'executiō est moindre que mestier ne fust, en ce qu'on ordonna que confession sacramentele ne fust point pource de nīce aux iugez à mort, en ce qu'il dōna pieça lettres que ie vis cōtre les abhominatiōs maudictes & ydolatriques qui se font en l'Eglise de France sous l'ymbre de la feste aux fols. Fols sont ils & pernicieux fols non à souffrir, besoin est de l'exécuter. Finalement quant à telles choses & semblables touchant la foy & la vie spirituelle, c'est chose tres ne-

cessaire y mettre prouisiõ par le cõmandement & assentement de la Royale pouruoyance, soit par auoir concils prouinciaux, soit par ordõner deputez en certain nõbre selon l'article dernier de la cedula de la restitution qui doiuet aduiser tout ce qui feroit à reformer à la spiritualité & tẽporalite de l'Eglise de France.

*La troisieme consideration d'Esperance.*

**P**Vis que la vertu d'Esperance est requise à la vie spirituele, celle vertu doit estre & aparoir au Roy en ses faiçts & en tous les subiects.

Cõtre ceste vertu võt forciers, forcieres, charmeurs, maudis, maugreeurs & tous ceux qui vsent de superstitions pour guerir maladies en inuocant l'aide de l'ennemy, cõc si Dieu fust moins puissant ou sage ou bien vueillant à aider que il n'est. C'est ce que i'ay dict parauant au premier point : Si fais cõtre telles gens vn argument euident & cõcluant à tout hõme qui a bon iugement de raison, Toy forcier & magicien qui promets & donne esperance à guerir vne maladie, ou c'est par miracle, ou par nature, ou par mal art: nõ par miracle, car tu ne mõstres point telle saincteté de vie que Dieu doiue faire miracle pour toy, mesmement quand tu fais cõtre ta loy. Quãts religieux ou autres deuots sont par le monde desquels on doit auoir plustost esperance qu'ils fissent miracle, si c'estoit la volüté de celuy qui seul fait les miracles, c'est Dieu. Si tu promets à guerir par nature, c'est à dire par medecine, or oses tu dire que tu es mieux à croire en ce cas que vingt ou trẽte, ou cinquante, ou cent maistres

## Harengue au Roy

en medecine qui ont estudié tout leur temps es li-  
ures de ceux qui ont trouué & déclaré la medecine  
veu que tu es sans lettre & sans science. Si tu con-  
fesses que tu veux vser de mauuais art deffendu, or  
il en est faict, ie ne demãde plus riẽ, de mauuais art  
iamais ne viendra biẽ. L'ennemy ne pourroit non  
plus faire de biẽ q̃ la glace eschauderoit. Fol est q̃  
s'y fie, tousiours vse & se sert du ieu à fauce cõpa-  
gnie. Qui plus l'hõnore & hante & pisen raporte:  
qui plus dit & fait de biẽ en le seruant, de tant pis  
vaut. Je laisse les histoires de Saul & d'Ochosias &  
d'autres. Si tu dis que c'est par art que tu vses, mais  
il est bon & loisible, ie te demãde qui en sera creu  
fil est cõtre la foy, ou toy, ou tous les theologiẽs  
& iuristes de Frãce: icy ie ne pourroie celer tãt soit  
tard que ie ne die la responce du Roy telle que ie  
l'ay sceue par vn prelat de France: on luy parloit  
d'aucuns qui vouloient ouurer en sa personne, en  
l'enhortant de mettre son esperance en Dieu plus  
qu'en autre chose, i'aimeroie mieux, dist le Roy,  
attendre la mort au bon plaisir de Dieu, que pour  
moy se fist chose qui fust cõtre Dieu & nostre foy:  
ô tresbelle & tresreligieuse responce, ô parole de  
Roy treschrestienne, parole plaine de vraie espe-  
rance, parole qui dessert à estre remuneree soit en  
ce mōde qui est peu de chose, soit en l'autre en par  
durable gloire: trop seroient à hair, trop seroient  
contraires à la bonne vie spirituelle du Roy & de  
sa sainte esperance qui vouldroient qu'autre cho-  
se se fist à sa noble personne.

*La quatriesme consideration de Charité.*



**P** Vis que Charité est le lien de perfection qui principalement garde la vie spirituelle & diuine, Charité qui est comme cherevnité doit souverainement estre gardee au Roy & es subiects. Diuisions & tous scismes qui meurdrirent la vie ciuile & la diuinité, dont viennent ils ie vous pry? sinõ par cupidité ambicieuse qui est le venin de charité? Si charité regnoit par tout, Charité, dis ie qui quiert nõ pas son ppre proufit, hõneur & gloire, mais ce qui est plaissant à Dieu & proufitable au bié cõmun, car elle n'est point ambicieuse, ne cõuoiteuse, *i. Corin. xiii.* Certes nous eussions incontinent paix & temporelemēt entre les seigneurs, & spirituellement entre les prelates de sainte Eglise Et icy pourroit estre faicte longue mention de la poursuite de l'union vniuerselle de l'Eglise attendu encores qu'on dit que les Espagnols ont trouué par dela & icy rapporté, mais vous cõnoissez que ie ne puis longuemēt arrester. Mon long parler ce doubte ay ie vous ennuie, la matiere aussi tāt de fois a esté proposee, arguee & declaree qu'il doit suffire, pource qu'il se doit faire mettre à execution par toutes voies raisonnables, en especial par la bouche plus breue, plus expediant & appaisant les cueurs, c'est la voie de cession volontaire des deux: & elle sera volontaire si à eux ne tient: Pourtant en faisant fin treshobles & excellēs Roy, Princes & Seigneurs, la fille du Roy regrant hūblemēt Dieu & vous de vostre bõ & saint ppos, accord, & aliance pour garder la vie corporele du Roy ciuile & spirituelle, supplie deuotement pour

## Harengue au Roy

vostre continuation l'execution breue, selon que mestier est, es points dessus nômez en general & de semblables, cõe de vostre haute prudẽce le sçauuez mieux aduiser: premieremẽt en la bonne santé corporele du Roy, secondemẽt en son domaine, le tiers au faict de la iustice, le quart au faict de la defence de son Royaume contre ses ennemis, le cinquiesme au faict de la franchise raisonnable desia octroyee à la fille du Roy l'vniuersité de Paris, contre subsides soiẽt dismes ou autres: le sixiesme au faict de la reformation del'Eglise de Frãce, soit par faire concils prouinciaux selon les anciens canons, soit par commettre gens de grand sens & preud'hõmie selon la cedule de la restitution ou dernier & principal article, dernièrement de toute l'Eglise, en extirpant ce detestable maudit & execrable schisme qui la destruit & gaste. Ces choses seront à l'honneur, gloire & plaisir de Dieu, au biẽ de toute Chrestienté, & à l'exaltation tresglorieuse du Roy, & de son Royaume & de tous vous messeigneurs qui y serez aidans & fauorisans: Ce sera en special à la cõsolation ioyeuse de tous les bons Frãçois qui par deuotion de liesse & exultation ferõnt & fõt ce beau cry, *Viuat rex, viuat rex, viuat rex.* Viue le Roy, viue le Roy, viue le Roy, voire & la Roine & monseigneur le Daulphin & toute la Royale lignee des fleurs de liz, & nous tous icy par grace & apres par gloire. *Præstante eo qui est vita nostra in quo viuimus, mouemur & sumus, qui est benedictus in secula.*  
*Amen, Deo gratias.*

PROTESTATIONS DV TRESCHRESTIEN  
Roy de France, Charles Vj. sur la determination du  
Concile de Basle.



**P**rotestatur Rex, sicut Princeps Christianissimus, suorum paratum se audire Ecclesiā, ritē & legitimē cōgregatam. Verūm quia apud multos graues & probos non modica est dubitatio, an suspensio, priuatio, & subsequēta electio facta Basilae sint ritē & canonicē facta & celebrata. Dubiū etiā est an illa congregatio illis diebus quibus praedicta agitata & facta sunt, sufficiēter repraesentaret vniuersalem Ecclesiā ad tantos & tam arduos actus. Idcirco Rex persistat & manet in obedientia domini Eugenij, in qua nunc stat. Vbi verò Rex plenē & sufficiēter de praedictis informatus fuerit, siue per œcumenicum aut aliud generale concilium, aut in cōgregatione Ecclesiæ suæ Gallicanæ extensius congregandæ: seu in cōuentione principum: Rex comperta veritate stabit cum ea, & ei adhaerebit.

Ces protestatiōs faictes par le Roy nostre sire, en la matiere courāt de l'Eglise, qui est matiere de foy & de scismes: & par ainsi vne des plus haultes & perilleuses matieres qui puisse estre, preseruent le Roy nostre sire, noz Seigneurs de son sang, son conseil, & son Royaume de tout peril, & de toute note d'heresie, & de scisme, quelque chose qui apres puisse aduenir. Et les oster & soy simplement determiner: cōstitue le Roy & nosdicts Seigneurs son conseil & tout son Royaume en peril. Et selō aucū cas qui pourroit aduenir en note perpetuele d'heresie & de scisme, il appert si en aucun cōcile general futur il estoit declaré cōtre nostre S. pere,

## Protestations du Roy

Lesdictes protestatiōs gardēt l'hōneur, charité, amitié, & fraternelle reuerēce du Roy & de nosdicts seigneurs, & du royaume enuers les autres Roys, princes & seigneurs Chrestiens: car par icelles il leur defere grandemēt, honorablemēt, & amiablemēt, &c. Et les oster & soy simplemēt determiner met le Roy & nosdicts seigneurs, son cōseil & le royaume en peril d'estre note d'auoir mesprisē & cōtēné les autres Roys & princes, &c. Et de vouloir tout faire à par soy & à sa volūtē: cōme s'il en estoit du tout en eux, &c. Lesdictes protestations veritablement consolent, quittēt, & appaisent les consciences de plusieurs, au regard d'aucuns scrupules qui peuuent suruenir. Et les oster & soy simplement determiner cause & fait le contraire.

Lesdictes protestations gardent l'hōneur, amour douceur, & benignité du Roy enuers l'Eglise de son royaume & Dauphiné: & si le preseruent de note, de hastiuerē & précipitation en si haute matiere. Et les oster & soy simplemēt determiner fait le cōtraire. Attēdu qu'à ceste assēblee les maistres en theologie seculiers ont requis estre ouis Attēdu aussi qu'à veritablemēt parler l'Eglise de Frāce, &c. mādēc par le Roy n'a pas esté icy suffisammēt assēblee & ouie, pour plusieurs raisons qu'on re monstrera au Roy quād tēps & lieu sera: & il luy plaira. Lesdictes protestatiōs maintiēnent & cōstituent le Roy propice, vtile, & aggreable mediateur à labourer & aider à la paix & vniō de l'Eglise. Et les oster & soy simplemēt determiner, &c. pourroit enuers plusieurs dōner matiere & ocaisiō du cōtraire: veu mesmemēt que plusieurs & d'estranges na-



tiōs ont veu la maniere de proceder d'aucūs: tāt en leurs paroles & faiçts: cōe en leurs pourchas īportuns enuers le Roy & noz seigneurs de sō sang, & de son cōseil: & tāt auant la venue du Roy cōe depuis. Lesdictes protestatiōs ont esté quasi par toutes les places de ce concile, &c. louees, ensuiuiues, & acceptees: ont esté par le Roy en sa presence & dudiçt cōcile de l'Eglise de son Royaume: ou il y a eu plusieurs estrāgers Alemās, Italiēs, Espagnols, Eçcollois, Sauoisieus & autres, dictes & leues publiquemēt p maniere de finale cōsequēce à toutes lesdictes deux pries, & dōt ia les plusieurs sont pris retournās en leurs païs: qui d'icelles & de la respōse du Roy emportēt copies. Et n'est point de doubte les publierōt. Et soit biē consideré & pesé si ce seroit l'hōneur du Roy maintenāt aps le deptement de luy & de noz seigneurs de son sang, aps la dissolution dud. cōcile & de sadiçte Eglise: & le ptemēt (cōe diçt est) de plusieurs estrāgers, oster lesdictes protestatiōs & y faire quelq̄ īmutatiō ou innouatiō de ce q̄ publiquemēt a ainśi esté diçt & faiçt requirir le Roy & noz seigneurs de son sīg & de sō cōseil: q̄ lō baille lettres sur la respōse faiçte p lediçt seigneur, esq̄lles ne soit faiçte aucūe mētion desdictes protestatiōs: & les vouloir par voies obliqs enueloper & les tenir obligees cōtre leur hōneur: & est enefect tollir & oster lesdict. protestatiōs, qlque chose q̄ lō fist à part. Car Dieu sçait cōmēt aucūs sçauēt biē publier & soy aider des lettres: quād elles sont à leurs ppos. Et semble à pler à verité & avec toute reuerēce, q̄ ceux qui à ce sollicitēt le Roy, & nosdits seign. de son sīg & de son cōseil, mōstrēt euidēmēt

## Protest. du Roy Charles VII.

qu'il ne leur chaut de l'honneur du Roy & de nosd. seigneurs, & de tout sō royaume: mais q̄ p̄ importunité ou autrement ils aiēt ce qu'ils demādent: & tiēnent les gēs simplemēt fort & estroit liez & obligez enuers eux, &c. Les prestatiōs dessusd. mōstrēt q̄ le Roy & son cōseil n'est point suffisammēt iformé de la verité, *patet euidentē*. Elles mōstrēt aussi q̄ l'Eglise du Royaume & Dauphiné n'a pas eslé p̄ faictemēt assēblee, *patet per id q̄ dicitur: q̄cū informatus fuerit in cōgregatiōe Ecclesiæ Gallicanæ extēsius cōgregāda. Ex p̄dictis sequitur*, q̄ tous loiaux prelatz & tous loiaux clerics, vrais subiects du Roy doiuent diligēmēt enq̄rir de la verité, & entr'eux discuter: à fin de aduiser le Roy en si haute matiere q̄ est matiere de foy, de scisme, & de toute enervatiō de l'auctorité de l'Eglise. *Sequitur Ultra*, qu'a l'Vniuersité de Paris app̄tiēt principalemēt, *patet. Tū p̄ obligationē* qu'elle a au Roy, de q̄ elle est fille adopriue: & par laq̄lle sa renōmee de treschrestie Prince luy a esté iusques icy cōseruce. *Tū etiā*: car nō pas seulemēt le Roy & son royaume p̄ icelle vniuersité de Paris sont informez en verité de la foy: mais toute regiō Chrestie ne. *Sequitur preterea* q̄ cōtraindre l'vniuersité de Paris à l'opposite est au tresgrād & grief p̄iudice du Roy, de son sang, & de son royaume. Itē c'est oster liberté en cōseil: qui seroit tirānie, & nō pas regale monarchie. Les dessusd. prestatiōs sont escrites en la librairie S. Victor, au l. p. 8. f. 124. *Et in eo. li. f. 135 ponitur respōso data p̄ venerabilē nationē gallicanā dominis Card. &c. appellātibus ab eiusdem cōclusiōe, voto, deliberatiōe, ac declaratiōe. Cost. captis & factis solēniter p̄ eādē q̄ vacātis & minuta seruitia nullo iure sunt debita, & de cetero nihil soluant, &c.* Pulpitre p. F I N.









